


# LE OLOMATAMATA

FAASILASILAINA LE MALO O IEOVA



MATAUPU MO SU'ESU'EGA MAI IĀ:  
TESEMA 3-30, 2018



ATA PITO I LUMA:  
**VENEZUELA**

O se tuafafine ma lana fanau o loo inu se vai suamalie a o auai i le tala'iga i Telares de Palo Grande i Caracas

'AUTALA'  
**149,355**

SU'ESU'EGA FAALE-TUSI PAIA  
**209,866**

Ë NA AUAI I LE FAAMANATUGA (2017)  
**478,266**

## LISI O MATAUPU

3 1918–100 Tausaga ua Mavae

6 VAIASO O TESEMA 3-9  
la Tautala i le Mea Moni

11 VAIASO O TESEMA 10-16  
A'oa'o Atu le Upu Moni

Ua taatele i aso nei le pepelo. Na faapefea ona amata mai lenei uiga? O le ā le pepelo e sili ona leaga? E faapefea ona 'alofia le faasesēina o i tatou, ma e faapefea ona faaalua atu o loo tatou tautatala i le mea moni? E faapefea ona faaogā a tatou Meafaigaluega mo le A'oa'o Atu, e a'oa'o atu ai le upu moni i la tatou faiva? O le a taliina na fesili i nei mataupu.

22 VAIASO O TESEMA 17-23  
la Maufaatutuaina Keriso  
lo Tatou Ta'ita'i

27 VAIASO O TESEMA 24-30  
la Faatumauina le Filemu o le  
Mafaufau pe a Suia o Tatou Tulaga

I le avea ai o i tatou o ni tagata e lē lelei atoatoa, e iai taimi e faigatā ai ona tatou talia ni suiga i o tatou olaga, po o suiga e faia e le faalapotopotoga. O le a fesoasoani nei mataupu e lua iā i tatou e faatumauina ai le filemu o le mafaufau, ma maufaatutuaina lo tatou Ta'ita'i o Keriso, pe a suia faafuase'i o tatou tulaga.

32 E TE SILAFIA?

17 TALAAGA O LE SOIFUAGA  
Na Matuā Faamanuia leova  
i La'u Faai'uga

E lē faatauina lenei tusi. Ua saunia e a'oa'oina ai le Tusi Paia i le lalolagi aoao, ma ua lagolagoina e ala i foa'i tauofo.

Mo le faia o foa'i tauofo, taga'i i le [www.jw.org](http://www.jw.org).

LE **OLOMATAMATA**  
FAASILASILAINA LE MALO O IEOVA

Se'i vaganā ua faailoa atu, ae o mau uma o loo i lenei tusi ua sii mai i le faaliliuga *O le Tusi Paia* —O le Faaliliuga a le Lalolagi Fou.

*The Watchtower* (ISSN 0043-1087) Issue 13 October 2018 is published by Watchtower Bible and Tract Society of New York, Inc.; L. Weaver, Jr., President; G. F. Simonis, Secretary-Treasurer; 1000 Red Mills Road, Wallkill, NY 12589-3299, and in Australia by Watchtower Bible and Tract Society of Australia, 12-14 Zouch Road, Denham Court, NSW 2565. © 2018 Watch Tower Bible and Tract Society of Pennsylvania. Printed in Australia.

October 2018  
Vol. 139, No. 13 SAMOAN

# 1918

## 100 TAUSAGA UA MAVAE

Na faatomua le *Watch Tower* o Ianuari 1, 1918 i le fesili lenei: “O ā ni mea o le a tutupu i le 1918?” O le taimi lenā o loo fai le Taua Muamua a le Lalolagi i Europa. Ae o mea na tutupu i le amataga o le 1918, na foliga mai ai o le a iai ni mea lelei e tulimata’ia e Tagata A’oga o le Tusi Paia, faapea tagata lautele.

### TALANOA LE LALOLAGI I LE FILEMU

Iā Ianuari 8, 1918, na faia ai e le peresitene o Woodrow Wilson se lauga i le Fono Faitulafono a le Lunaite Setete, ma ta’ua ai ni manatu se 14 e fesoasoani e maua ai “le faamasinotonu ma le filemu tumau.” Na ia faatāua auala e soālaupule ai mataupu i le va o atunuu, faaitiitia meatau, ma faavaeina se “faalapotopotoga faavaomalo” e pui-puia “atunuu tetele ma atunuu lāiti.” Mulimuli ane, na faaaogā “Manatu e 14” o le peresitene e fai ma faavae o Malo Sosoo, atoa fo’i ma le Feagaiga i Versailles. O le i’uga, na faauma ai le Taua Muamua a le Lalolagi.

### E LE’I TAULAU TAUMAFAGA A TAGATA TETEE

E ui lava na vevesi le tausaga ua te’a,\* ae na foliga mai o le a olioli Tagata A’oga o le Tusi Paia i le filemu, e pei ona faamaonia i mea na tutupu i le fonotaga faaletausaga o mataupu faapisinisi a le Watch Tower Bible and Tract Society.

A o faia lenei fono iā Ianuari 5, 1918, na taumafai nisi tane e faoa le tulaga pule mai i ē na ta’imua i le faalapotopotoga a Ieova. Na latou umia i se taimi muamua ni tofiga tāua, ae na aveesea i latou

\* Taga’i i le mataupu “One Hundred Years Ago—1917” i le 2017 *Yearbook of Jehovah’s Witnesses*, itu. 172-176.

mai i le Peteli. Na tatala e Richard H. Barber le fono i se tatalo, ma o ia o se ovasia femalagaa’i faamaoni. Ina ua mae’a le lipoti o galuega o le tausaga ua te’a, ona faia lea o le palota faaletausaga mo faatonu o le sosaiete. Na faatū atu e le uso o Barber le uso o Joseph Rutherford ma isi uso e to’aono. Ae na faatūina e se lōia na lagolagoina le itu tetele, igoa o isi tane e to’afitu e aofia ai ma tane na aveesea mai i le Peteli. E le’i taulau a latou taumafaiga. O le to’atele o ē e iai sea (shareholders) na palota mo le uso o Rutherford ma isi uso faamaoni e to’aono, ina ia fai i latou ma faatonu.

O le to’atele o uso na auai i lenā fono, na latou faapea mai “o le fonotaga sili lenā na faafiafiaina ai i latou ona o le faamanuia a Ieova.” Peita’i, e le’i umi ae suia loa le tulaga o mea.

### LE TALI ATU A TAGATA I LE TUSI THE FINISHED MYSTERY

Na tufatufaina e Tagata A’oga o le Tusi Paia le tusi *The Finished Mystery* mo ni nai masina. Na fiafia tagata lotofaamaoni a o faitau i upu moni mai i le Tusi Paia na faamatalaina i lenā tusi.

Na faamatala e E. F. Crist, o se ovasia femalagaa’i i Kanata, se ulugalii na faitau i le tusi *The Finished Mystery* ma taliaina le upu moni i le na o le lima vaiaso. Na faapea mai o ia: “Ua tuutoina atoatoa i la’ua i le Atua, ma o loo faaaauau ona aga’i-ga’i i luma faaleagaga.”

Ina ua maua e se tamāloa lenei tusi, na ia faailoa atu loa i ana uō mea na ia faitauina. Na pā’ia lona loto i faamatalaga i le tusi. Na faapea mai o ia: “A o o’u savali i le auala, na iai se mea mamafa na pa’ū mai ma tau i lo’u tau’au. Na faapea a’u o se piliki,



ae e leai o le tusi 'The Finished Mystery.' Na ou alu ma le tusi i le fale ma faitau atoa i ai. . . . Na ou iloa mulimuli ane na togi i fafo e se faife'au le tusi mai i le faamalama, ona o lona ita . . . Ae ou te talitonu o lenā gaoioiga na mafai ai ona ia faaliliuina le to'atele o tagata i se faamoemoe pupula, nai lo o se isi lava gaoioiga na ia faia i lona olaga atoa. . . . O le ita o le faife'au, ua māfua ai ona matou vivii i le Atua i le taimi lenei."

Peita'i, e lē na o le faife'au na ita i le tusi. Na faasā e le malo o Kanata le tusi iā Fepuari 12, 1918, e ala i le faapea mai o se tusi e iai faamatalaga faatupu vevesi ma tetee i le taua. E le'i umi ae faasā fo'i e le Iunaite Setete le tusi. Na ō atu tagata o le malo i le Peteli ma ofisa i Niu Ioka, Pennsylvania, ma Kalifonia, ina ia sa'ili ni faamaoniga e molia ai uso na ta'imua i le faalapopotogata. Iā Mati 14, 1918 na faasā ai e le Matagaluega o Faamasinoga a le Iunaite Setete le tusi *The Finished Mystery*, ma faapea mai o le lomaiaina ma le tufatufaina o lenei tusi, o se faiga e tetee i le taua. Na latou manatu na solia e le tusi le Espionage Act, o se tulafono na faasā ai so o se taumafaiga e tetee i le taua.

### LAFO USO I LE FALEPUIPUI

Iā Me 7, 1918, na tuuina atu ai e le Matagaluega o Faamasinoga ni tusi saisai mo Giovanni DeCecca, George Fisher, Alexander Macmillan, Robert Martin, Frederick Robison, Joseph Rutherford, William Van Amburgh, ma Clayton Woodworth. Na tuua'ia i latou i le "fouvale, solitulafono, tetee

ma le lotu i ai i le faigāmalo, lē faamaoni, ma lē fia lagolagoina le vaega'au ma fuāvaa tau a le Iunaite Setete." Na amata lo latou faamasinoga iā Iuni 3, 1918, ma na mautinoa o le a faasalaina i latou. Aiseā?

Na ta'ua e le lōia sili o le Iunaite Setete le tulafono o le Espionage Act, "o se auupega lelei e tao-fia ai le salalau atu o faamatalaga taufaasesē," ma na manatu o ia na solia e uso lenā tulafono. Na teena e le Fono Faitulafono iā Me 16, 1918 le toe teuteuga o le Espionage Act, lea na semanū e pui-puia ai i latou na lomaiaina "faamatalaga e moni, lelei, ma tonu." Sa avea le tusi *The Finished Mystery* o se mataupu autū i a latou finauga. Na ta'ua i faa-maumauga aloa'ia a le Fono Faitulafono a le Iunaite Setete: "O le tusi 'The Finished Mystery,' o se faaa'oa'oga sili ona mata'utia o faamatalaga tau-faasesē . . . E pau le aafiaga o lenei tusi, o le uuna'ia lea o fitafita ina ia faalēaogā a matou taumafaiga . . . ma mumusu ai e auai i le vaega'au."

Iā Iuni 20, 1918, na fai ai le faai'uga a le 'aufaatonu o le faamasinoga e faasala uso uma e to'avalu. I le aso na sosoo ai, na lau ai e le faamasino o latou faasalaga. Na faapea atu o ia: "O le lotu o loo lagolagoina malosi ma tala'ia e nei tamālooa . . . e sili atu ona mata'utia nai lo o se vaega o fitafita a Siamani. . . . E tatau ona mamafa lo latou faasalaga." I le lua vaiaso na sosoo ai, na faafalepuipui nei uso e to'avalu i Atlanta i Georgia ma e eseese o latou faasalaga e amata mai i le 10 tausaga se'ia oo i le 20 tausaga.



## FAAAUUAU LE GALUEGA TALA’I

Na feagai Tagata A’oga o le Tusi Paia ma le tele o teteega i lenā taimi. Na matuā su’esu’e e le FBI (o le matagaluega e gafa ma su’esu’ega o soligatula-fono) galuega a uso, ma latou faia ai le tele o faamaumauga. Na faamaonia i nei su’esu’ega le maelega o uso e faaauau pea le galuega tala’i.

Na tusi atu le pule o le falemeli i Orlando i Florida i le FBI e faapea: “O loo tala’i atu mai i lea fale i lea fale [Tagata A’oga o le Tusi Paia] ma e tele ina tala’i i pō. . . . E foliga mai o loo latou faaosesa i tagata e ala i le faaauau pea ona tala’i.”

Na tusi atu se ofisa sinia o le vaega’au i le FBI e lipotia ai galuega a Frederick W. Franz, o lē na auuna mulimuli ane i le Vaega Pule. Na tusi o ia e faapea: “Na matuā to’aga F. W. Franz e faatau atu i tagata le faitau afe o tusi o le ‘Finished Mystery’.”

Na oo fo’i sauāga ogaoga iā Charles Fekel, o lē na auuna mulimuli ane i le Vaega Pule. Na ave o ia e leoleo ona o le tufatufaina o le tusi *The Finished Mystery*, ma latou mātā’itū ana tusi na lafo atu i isi. Na faafalepuipui o ia i Baltimore i Maryland mo le tasi le masina, ma ta’ua o ia o se “fili mai i Oseteria.” A o molimau atu ma le lototele i leoleo, na ia manatuaina upu a Paulo i le 1 Korinito 9:16 e faapea: “Oī talofa iā te a’u pe a ou lē folafolaina atu le tala lelei!”\*

\* Taga’i i le talaaga o le soifuaga o Charles Fekel, “Joys Through Perseverance in Good Work,” i *Le Olomatamata* faa-Peretania o Mati 1, 1969.

E lē gata i le maelega i le tala’iga, ae na sogasogā fo’i Tagata A’oga o le Tusi Paia e faasavali la latou pepa talosaga e saina e tagata, ina ia faasa’oloto ai uso na faafalepuipui i Atlanta. Ua faapea mai Anna K. Gardner: “Na matou pisi i le tele o taimi. A o faafalepuipui uso, na matou feoa’i e sa’ili tagata ina ia saina i le pepa talosaga. Na matou ō i lea fale ma lea fale, ma e faitau afe tagata na saina ai. Na matou faapea atu i tagata, ua faafalepuipui ma le lē tonu nei Kerisiano moni.”

## TAUAOFIAGA

Na faia le tele o tauaofiaga ina ia faamallosia faaleagaga ai le ‘auuso, a o faagasolo lenā taimi faitagā. Na ta’ua i le *Watch Tower*: “E silia ma le 40 tauaofiaga na faia a o faagasolo le tausaga . . . E tele lipoti lelei na maua mai e faatatau i nei tauaofiaga uma. I le taimi muamua, sa masani ona faia tauaofiaga i ni nai masina (“lua pe tolu”) i le tausaga, ae i le taimi lenei ua faia i masina ta’itasi.”

Sa faaauau fo’i ona talia e tagata lotofiafia le tala lelei. I se tasi o tauaofiaga i Cleveland i Ohio, e pe tusa e 1,200 le aofia ma e to’a 42 i latou na papatiso, e aofia ai se tamaitiiti “e malosi lona faatua-tua i le Atua lea atonu e sili atu nai lo o le to’atele o tagata matutua.”

## O LE Ā O LE A TUPU?

A o lata ina mae’a le 1918, e le’i mautinoa po o le ā se mea o le a tupu i Tagata A’oga o le Tusi Paia. Na faatau ese nisi o fale o le lālā i Brooklyn, ma siitia atu le ofisa ulu i Pittsburgh i Pennsylvania. A o iai uso ta’imua i le falepuipui, na faatulaga ai le isi fono faaletausaga a le Sosaiete e fai iā Ianuari 4, 1919. O le ā o le a tupu?

Na tutumau o tatou uso i la latou galuega. O le mautinoa i lo latou lumana’i, na latou filifilia ai le Isaia 54:17 e fai ma mau o le tausaga 1919: “O aupega uma e faia e tau ma oe e le manuia ia.” (*Tusi Paia Samoa*—Lomiga 1969) Na latou nofosauni mo se suiga lelei, e lē gata o le a faamallosia ai lo latou faatua-tua, ae o le a faaaupegaina ai fo’i i latou mo le galuega tele o le a latou faia.





## Ia Tautala i le Mea Moni

*“Ia tautala i le mea moni o le tasi i le isi.”—SAKA. 8:16.*

PESE: 56, 124

### O LE Ā LAU TALĪ?

Ua faapefea ona faasesēina e Satani tagata i aso nei?

Aiseā e masani ai ona pepelo tagata?

E faapefea ona faaalua atu o loo tatou tautatala i le mea moni?

O TELEFONI, matāuila, taavale, ma pusa‘aaisa, o nisi ia o mea faaonapōnei ua aogā i aso ta‘itasi. Ae e iai fo‘i nisi o mea ua lamatia ai le ola e pei o fana, maina e tatau i le palapala, sikareti, pomu atomika, ma isi lava mea. Peita‘i, e iai se isi mea e mata‘utia atu ua leva ona iai, ua matuā telē lona aafiaga i tagata. O le ā lenā mea? O le pepelo, o le faia lea o se tala e iloa e lē moni ina ia faasesē ai se isi tagata. O ai na faia le ulua‘i pepelo? Na faailoa mai e Iesu Keriso o “le Tiapolo” o ia o “le tamā o le pepelo.” **(Faitau le Ioane 8:44.)** O anafea na ia faia ai lenā pepelo?

<sup>2</sup> Na tupu lenā mea i le faitau afe o tausaga ua mavae i le faato‘aga o Etena. Na olioli le ulua‘i ulugalii o Atamu ma Eva i le Parataiso na faia e Lē na foafoaina mea mo i la‘ua. Na faatonuina e le Atua i la‘ua e aua le aai i “le laua e iloa ai le lelei ma le leaga,” ma pe a la lē ususita‘i o le a la feoti. E ui na iloa e Satani lenā mea, ae na ia fai atu iā Eva e ala i se gata: “E lua te lē oti lava [o le ulua‘i pepelo lea]. Auā ua silafia e le Atua, o le aso lava lua te aai ai e pupula ai o oulua mata, ona pei ai lea o oulua o le Atua, e iloa le lelei ma le leaga.”—Kene. 2:15-17; 3:1-5.

<sup>3</sup> Na faia e Satani se pepelo taufaaleaga, ona sa ia iloa lelei pe

1, 2. O le ā le mea mata‘utia ua matuā telē lona aafiaga i tagata, ma o ai e tuua‘ia i lenā mea?

3. Aiseā e faapea atu ai na faia e Satani se pepelo taufaaleaga, ma o le ā ua i‘u atu i ai?

a talitonu Eva iā te ia ma ‘ai le fua o le laau, o le a oti ai o ia. Na lē usiusita’i Atamu ma Eva i le faatonuga a Ieova ma feoti ai i se taimi mulimuli ane. (Kene. 3:6; 5:5) Ae e sili ai ona leaga, o le agasala ‘ua oo mai ai le oti i tagata uma.’ E lē gata i lea, ua “pule le oti e pei o se tupu . . . , e oo lava iā i latou e le’i agasala e pei o le agasala a Atamu.” (Roma 5:12, 14) Nai lo o le maua e tagata o le tulaga lelei atoatoa ma ola e faavavau e pei o le finagalo o le Atua i le amataga, o le to’atele ua na o le “fitu sefulu tausaga” le umi e ola ai, “ae afai e iai se malosi faaopopo, e oo atu i le valu sefulu tausaga.” E ui i lea, ua faatumulia le olaga i “faafitauli ma mea e tigā ai.” (Sala. 90:10) Pagā le mata’utia o āuga o le pepelo a Satani!

4 Ina ua faamatala e Iesu le gaoioiga na faia e le Tiapolo, na ia faapea mai: “E le’i tumau lava o ia i le upu moni, auā e lē o i totonu iā te ia le upu moni.” Talu ai e lē o i totonu lava o Satani le upu moni, o le māfuaaga lea o loo faaauau ai ona ia “faasesēina le lalolagi atoa” i ana faamatalaga pepelo. (Faaa. 12:9) E tatou te lē manana’o e faasesēina i tatou e le Tiapolo. O lea, se’i o tatou iloilo ina fesili nei e tolu: Ua faapefea ona faasesēina e Satani tagata? Aiseā e masani ai ona pepelo tagata? Talu ai e tatou te lē manana’o e melea la tatou faauōga ma Ieova e pei ona faia e Atamu ma Eva, e faapefea la ona faaalua o loo tatou ‘tautatala ma le faamaoni’ i taimi uma?—**Faitau le Salamo 15:1, 2.**

#### UA FAAPEFEA ONA FAASESĒINA E SATANI TAGATA?

5 Na iloa e le aposetolo o Paulo e mafai ona tatou ‘alofia le ‘faasesēina o i tatou e

4. (a) O ā fesili e mana’omia ona tatou taliina? (e) E tusa ai ma le Salamo 15:1, 2, e na o ai e mafai ona avea ma uō a leova?

5. Ua faapefea ona faasesēina e Satani tagata i aso nei?

Satani, auā tatou te lē valea i ana togafiti.’ (2 Kori. 2:11) Ua tatou iloa o loo pulea e le Tiapolo le lalolagi atoa e aofia ai lotu sesē, faiga faapolotiki pi’opi’o, ma faiga faapisinisi matape’ape’a. (1 Ioa. 5:19) E lē faate’ia la i tatou pe a taa’ina e Satani ma ana temoni tagata maualuluga, ina ia latou faia ni “tala pepelo.” (1 Timo. 4:1, 2) O le tulaga moni na o nisi o tagata o loo faia pisinisi tele, ua latou faalauiloa oloa leaga ma faiga taufaasesē e ala i faasalalaua pepelo.

6 E matuā nofosala ta’ita’i lotu pepelo ona ua lamatia ai le lumana’i o tagata e talitonu i a latou pepelo. Pe a talia e se tagata se a’oa’oga sesē ma faatino se mea e ta’usalaina e le Atua, e mafai ona aafia ai le ola e faavavau o lenā tagata. (Ho. 4:9) Na tuua’ia e Iesu ta’ita’i lotu i ona aso mo na faiga taufaasesē. Na ia fetalai tuusa’o iā i latou: “Oī talofa iā te outou le ‘autusiupu ma le ‘au Faresaio, tagata faafiaamionu! auā ua outou faimalaga i le sami ma le laueleele ina ia faaliulotu mai se tagata, ma pe a maua o ia, ona outou faia lea o ia ma tagata e tatau ona alu i Kena [faaumatiaga a’ia’i], e sili atu lona faasalaga i lo o outou.” (Mata. 23:15; fpl.) Na matuā ta’usalaina e Iesu na ta’ita’i lotu sesē. O i latou ‘e mai i lo latou tamā le Tiapolo, o le fasioti tagata.’—Ioa. 8:44.

7 Ua matuā to’atele ta’ita’i lotu i le lalolagi i aso nei, e tusa pe e ta’ua o faife’au, patele, rapi, tagata paia, ma isi lava ta’u. E pei o ta’ita’i lotu i le ulua’i senituri, ua “taofiofia” e ta’ita’i lotu i aso nei “le upu moni” mai i le Afioaga a le Atua, ma ua latou “fesuia’ia le upu moni a le Atua ma le upu pepelo.” (Roma 1:18, 25) Ua latou faaauiluma a’oa’oga sesē e pei o le afi i seoli, ola pea o le agaga pe a oti le tagata,

6, 7. (a) Aiseā e matuā nofosala ai ta’ita’i lotu pepelo? (e) O ā a’oa’oga pepelo o loo a’oa’o e ta’ita’i lotu?

toe ola mai o le tagata i se isi tino, ma le manatu sesē e talia e le Atua faiga tauatane ma tauafafine ma le faaipoipo o le itupā lava e tasi.

<sup>8</sup> Ua faaaogā e ta'ita'i faapolotiki tala pepelo e faasesēina ai tagata. O se tasi o pepelo matuiā ua toetiiti ona tatou faalogoina lea, o le faalauiloaga: “Ua filemu ma saogalem!” Peita'i, “ona oo faafua-se'i mai loa lea o le faumatiaga iā i latou.” Aua ne'i faasesēina i tatou i a latou faamatatalaga ua taumafai e natia ai le tulaga faalētonu o lenei faiga o mea. O le mea moni, ua tatou “iloa lelei, e oo mai lava le aso o Ieova e pei o se gaoi i le pō.”—1 Tesa. 5: 1-4.

### AISEĀ E MASANI AI ONA PEPELO TAGATA?

<sup>9</sup> Pe a lauiloa se mea fou, e vave ona tau-lia. E faapena le salalau atu o tala pepelo, ua avea o se mea ua taatele i aso nei, ma e lē na o tagata maualuluga o loo faasesēina isi. Ua ta'ua i le tusitusiga “Māfuaaga e Tatou te Pepelo Ai” a Y. Bhattacharjee, “ua mātaulia le pepelo o se uiga ua matuā maua i loto o tagata.” E masani ona pepelo tagata ina ia puipuia pe faasilisilia ai i latou. E latou te pepelo ina ia ufiufi ai a latou mea sesē, pe maua ai fo'i o latou manuia faaletino ma tamaoaiga. E pei ona ta'ua i lea tusitusiga, e iai tagata “e pei o se meanoa le pepelo i mea lāiti ma mea tetele, e pepelo i tagata ese, ē e latou te faigaluega faatasi, uō, ma ē e pele iā i latou.”

<sup>10</sup> O le ā le i'uga o nei pepelo uma? E faaleagaina ai faia ma lē toe maufaatuatua

8. O le ā le pepelo ua toetiiti ona faailoa mai lea e ta'ita'i faapolotiki, ma o le ā le auala e tatau ona tatou tali atu ai?

9, 10. (a) Aiseā e pepelo ai tagata, ma o le ā ua i'u i ai? (e) O le ā e tatau ona tatou manatua e faatatau iā Ieova?

ai e le tasi le isi. Se'i mafaufau i se tulaga faanoanoa pe a lē faamaoni se avā i lana tane ma pepelo e ufiufi ai lana mulilua. Po o se tane fo'i e sauā ma faatigā, e soonafai lana avā ma lana fanau pe a na o i latou, ae e faafoliga atu o se tane lelei i luma o tagata. Peita'i, e tatau ona tatou manatua, e lē mafai e na tagata taufaasesē ona natia so o se mea mai iā Ieova, auā “e taatitia fua mai mea uma, ma ua matuā faaalua mea uma” i lana silafaga.—Epe. 4:13.

<sup>11</sup> O se faaa'oa'oga, o loo ta'ua i le Tusi Paia le auala na 'faatupu ai e Satani i loto' o se ulugalii Kerisiano i le ulua'i senituri e pepelo i le Atua. Na faufau Anania ma Safaira e faasesē le 'auapose-tolo. Na faatau atu so la fanua, ae na avatu na o se vaega o le tau o le fanua i le 'auapose-tolo. Na manana'o le ulugalii e ta'uleleia i la'ua i le faapotopotoga, e pei ua sili atu lo la limafoa'i. Peita'i, na silafia e Ieova le mea na la faia ma na ia faasalaina i la'ua.—Gal. 5:1-10.

<sup>12</sup> O ā faalogona o Ieova e faatatau i le pepelo? O le i'uga o Satani ma ē e lē salamō e faaa'oa'o iā te ia ma faia pepelo taufaaleaga, o le “lepa afi” lea. (Faaa. 20:10; 21:8; Sala. 5:6) Aiseā? Talu ai ua faavasega faatasi e Ieova tagata pepelo ma isi tagata e amioa'i e pei o ni “ta'ifau,” o ē e faia mea e inosia e ia.—Faaa. 22:15.

<sup>13</sup> Ua tatou iloa o Ieova 'e lē o se tagata e tala pepelo ai o ia,' ma 'e lē mafai ona pepelo le Atua.' (Nu. 23:19; Epe. 6:18) “E matuā inosia lava e [Ieova] . . . le laulau-faiva pepelo.” (Faata. 6:16, 17) Ina ia tatou maua lona finagalo malie, e tatau ona

11. O le ā e tatou te a'oa'o ina mai i le faaa'oa'oga leaga a Anania ma Safaira? (Taga'i i le ata i luga a'e o le matua.)

12. O le ā le i'uga o ē e lē salamō ma faia pepelo taufaaleaga, ma aiseā?

13. O le ā ua tatou iloa e faatatau iā Ieova, ma o le ā ua uuna'ia ai i tatou e fai?



tatou tautatala ma le faamaoni i taimi uma. O le māfuaaga lea e tatou te lē ‘pepelo ai o le tasi i le isi.’—Kolo. 3:9.

### E TATOU TE ‘TAUTATALA I LE MEA MONI’

<sup>14</sup> O le ā se tasi o auala e faaesea ai Kerisiano moni mai i tagata o lotu sesē? E tatou te ‘tautatala i le mea moni.’ (**Faitau le Sakaria 8:16, 17.**) Na faapea mai Paulo: “Ua matou faailoa atu ai i matou o ni au-auna a le Atua, e ala . . . i le tautala i le upu moni.” (2 Kori. 6:4, 7) Na fetalai Iesu e faatatau i le tagata: “O le tele o mea i le loto e tautala mai ai lona gutu.” (Luka 6:45) O lea, pe a tautala faamaoni se tasi i lona loto, o le a faamaoni fo’i ana faamatalaga. O le a ia tautala faamaoni i mea tetele ma mea lāiti i tagata ese, ē e faigaluega faatasi, uō, ma ē e pele iā te ia. Se’i mafaufau i nisi o faaa’oa’oga nei e iloa ai o loo tatou taumafai e faamaoni i mea uma.

<sup>15</sup> E faapefea pe afai o oe o se talavou o

14. (a) E faapefea ona faaesea i tatou mai i tagata o lotu sesē? (e) Faamatala le mataupu silisili o loo i le Luka 6:45.

15. (a) Aiseā e lē atamai ai le ola i se olaga uigalua? (e) O le ā e fesoasoani i talavou ina ia teena omiga mai i isi talavou? (Taga’i i le faaopoopoga i le pito i lalo.)

loo mana’o e fafia mai iā te oe isi e tou te tupulaga faatasi? Ia faamautinoa e te lē faia le mea na faia e isi o le ola lea i se olaga uigalua. E latou te faaalua uiga lelei pe a iai ma aiga ma le faapotopotoga, ae e matuā sui lava pe a faatasi ma talavou o le lalolagi, pe faaogā fo’i auala o fesoota’iga i le Initaneti. Atonu e latou te faaogā gagana masoā, ofu lē talafeagai, musika matagā, fualaau faasāina, inu tele i le ‘ava malosi, fai nanā se uō, pe faia ni mea e sili atu ona leaga. E pepelo i o latou mātua, uso talitonu faapea leova. (Sala. 26:4, 5) E silafia e leova taimi e tatou te ‘āva atu ai iā te ia i o tatou laugutu, a ua mamao ese lava o tatou loto mai iā te ia.’ (Mare. 7:6) Ma’eu le lelei o le utagia o le faataoto lenei: “Aua ne’i leaga lou loto i ē e agasala, ae ia mata’u iā leova i le aso atoa.”—Faata. 23:17.\*

<sup>16</sup> Atonu o loo e fia galue o se paeonia sauatoa pe i se isi vala o le auunaga

\* Taga’i i le mataupu e 6, “E Faapefea Ona Ou Tetea Atu i Faaosoosoga Mai i Isi Talavou?” i le polosua *Tali i Fesili e 10 a Talavou*, ma vitiō “Tetea Atu i Omiga Mai i Aumea!” ma le “Aua le Faaa’oa’o i É e Lē Faamaoni,” i le TV i le Initaneti a Molimau a leova.

16. O le ā le auala e tatau ona e taliina ai fesili i le pepa talosaga mo se vala o le auunaga faataimi atoa?

Po o e iloa atu le faafitauli i le olaga o lenei tuafafine talavou?

(Taga’i i le palakalafa e 15, 16)



faapitoa faataimi atoa, e pei o le Peteli. A o faatumu lau pepa talosaga, e tāua ona tali ma le faamaoni fesili uma e faatatau i lou soifua mālōlōina, o au faafiafiaga, ma au amioga. (Epe. 13:18) Ae e faapefea pe afai na e aafia i nisi o amioga e lē mamā pe e lē talafeagai e lē o iloa e toeaina? Ia sa‘ili la latou fesoasoani ina ia mafai ai ona e auauna ma se lotofuatiaifo mamā.—Roma 9:1; Kala. 6:1.

<sup>17</sup> O le ā e tatau ona e faia pe afai e iai ni faasāsāaga i le galuega o le Malo i lou atunu, ma ua fesiligia oe e faatatau i o tatou uso? Pe e tatau ona e ta‘uina iā i latou mea uma o loo e iloaina? O le ā na faia e Iesu ina ua fesiligia o ia e le kovana o Roma? E iai taimi e le‘i tali atu ai Iesu, ma e ōgatusa lea ma le mataupu silisili, ‘e iai le taimi e filemu ai ma le taimi e tautala ai.’ (Fai. 3: 1, 7; Mata. 27:11-14) I tulaga faapena, e tāua ai ona tatou faaalua le tofā mamao, ina ia aua ai ne‘i lamatia o tatou uso.—Faata. 10:19; 11:12.

<sup>18</sup> O le ā e tatau ona e faia pe a faia e se tasi i le faapotopotoga se agasala matuā,

17. O le ā e tatau ona tatou faia pe a fesiligia i tatou e ē tetee e faatatau i o tatou uso?

18. O le ā e tatau ona e faia pe a fesiligia oe e toeaina e faatatau i se mea sesē na faia e se uso?

ma o loo e iloaina le mea na tupu? O le tiute tauave o toeaina o le puipuia lea o le mamā tauamio o le faapotopotoga, ma atonu e latou te fesiligia oe e faatatau i le mea na tupu. O le ā e te faia pe afai o lē na aafia o sau uō māfana po o sou tauaiga fo‘i? “O lē e tautala i le faamaoni, e ta‘u atu mea ua tonu.” (Faata. 12:17; 21:28) O lea, e tatau ona e faailoa i toeaina le mea atoa na tupu, ae e lē na o ni nai faamatalaga, pe sui fo‘i le faamatalaga. E mana‘omia ona iloa e toeaina mea uma na tutupu, ina ia latou iloa ai le auala sili e fesoasoani ai i le tagata faimea sesē e toe faalelei lana faiā ma Ieova.—Iako. 5:14, 15.

<sup>19</sup> Na tatalo le faisalamo o Tavita iā Ieova: “Ua e fiafia i le faamaoni o le loto.” (Sala. 51:6) Na iloa e Tavita, o le faamaoni o se mea e sau mai i le loto. O lea, e tatau i Kerisiano moni ona ‘tautatala i le mea moni o le tasi i le isi’ i vala uma o o latou olaga. O se isi auala e mafai ona ese mai ai i tatou o auauna a le Atua, o le a‘oa’o atu lea o upu moni a le Atua i la tatou faiva. O le mataupu lenā o le a iloiloaina i le su‘esu‘ega o loo sosoo mai.

19. O le ā o le a iloiloaina i le mataupu o loo sosoo mai?

---

E faapefea ona e iloa le taimi e filemu ai ma le taimi e faamatala ai le mea atoa na tupu?  
(Taga‘i i le palakalafa e 17, 18)





# A'oa'o Atu le Upu Moni

*“Ieova e, . . . e moni lava lau afioga atoa.”*

—SALA. 119:159, 160.

SA AVEA Iesu Keriso ma kamuta ma a'oa'o. (Mare. 6:3; Ioa. 13:13) Sa matuā lelei le faatinoina e Iesu o nei galuega. I le avea ai o ia ma kamuta, na ia a'oa'oina le auala e faaaogā ai meafai-galuega e faia ai ni oloa mai i laupapa. I le avea ai fo'i o ia ma a'o-a'o, na ia faaaogā lelei lona iloa o Tusitusiga Paia e fesoasoani ai i tagata ina ia malamalama i upu moni o le Afioiga a le Atua. (Mata. 7:28; Luka 24:32, 45) Ina ua 30 tausaga o Iesu, na ia lē toe faaaogāina ai meafaigaluega faakamuta, ona sa ia iloa e sili atu ona tāua lana galuega o se a'oa'o. Na ia faapea mai o le faa-lauiloa atu o le tala lelei o le Malo o le Atua, o se tasi lea o mā-fuaaga na auina mai ai o ia i le lalolagi. (Mata. 20:28; Luka 3:23; 4:43) Na avea le faiva a Iesu ma taula'iga o lona olaga, ma na ia mana'o fo'i e auai isi i lea galuega.—Mata. 9:35-38.

<sup>2</sup> Atonu e lē o i tatou o ni kamuta, ae o i tatou o ē e tala'ia atu le tala lelei. E matuā tāua lea galuega ona e aofia ai le Atua, ma ua ta'ua fo'i i tatou “o le 'aufaigaluega faatasi ma le Atua.” (1 Kori. 3:9; 2 Kori. 6:4) E tatou te talitonu 'e moni lava le afioga atoa a Ieova.' (Sala. 119:159, 160) O le māfuaaga lea e tatou te manana'o ai e faamautinoa, o loo tatou “taulimaina ma le sa'o le upu moni” i la tatou faiva. **(Faitau le 2 Timoteo 2:15.)** O lea, e

1, 2. (a) O le ā le galuega na avea ma taula'iga o le olaga o Iesu, ma aiseā? (e) O le ā e tatau ona tatou faia ina ia taulau manuia ai o se “aufaigaluega faatasi ma le Atua”?

PESE: 29, 53

## O LE Ā LAU TALĪ?

O le ā e tatau ona taula'i i ai la tatou faiva?

Aiseā ua saunia ai Meafaigaluega mo le A'oa'o Atu?

O le ā se meafaigaluega o loo mana'omia ona e faamasani lelei i ai?

tāua ai ona faaleleia pea o tatou tomāi i le faaaogāina o le Tusi Paia, o le meafaigaluega autū lea o loo tatou a’oa’oina atu ai upu moni e faatatau iā Ieova, Iesu, ma le Malo. Ina ia tatou taulau i la tatou faiva, ua saunia mai ai e le faalapotopotoga a Ieova nisi o meafaigaluega tāua e mana’omia ona tatou faamasani lelei i ai, lea ua ta’ua o Meafaigaluega mo le A’oa’o Atu.

<sup>3</sup> Atonu e te taumānatu po o le ā le māfuaaga ua ta’ua ai o Meafaigaluega mo le A’oa’o Atu, ae e lē ta’ua o Meafaigaluega mo le Tala’iga. O le “tala’i,” e uiga atu i le faalauiloa atu o se fe’au, ae o le “a’oa’o atu” e uiga atu i le tāmāu o le fe’au i le mafaufau ma le lotu o se tagata, ma faatatau ai mea ua ia a’oa’oina. I lenei la taimi o loo totoe, e tatau ona tatou ua’i atu i le amataina o su’esu’ega faale-Tusi Paia, ma a’oa’o tagata e faatatau i le upu moni. O lona uiga e tatau ona tatou matuā sa’ili mo ē “ua saunia o latou lotu mo le ola e faavavau,” ma fesoasoani e avea i latou ma ē e talitonu.—**Faitau le Galuega 13:44-48.**

<sup>4</sup> E faapefea ona tatou iloa i latou “ua saunia o latou lotu mo le ola e faavavau”? E pei o le ulua’i senituri, e pau le auala e maua ai tagata faapena o le molimau atu iā i latou. O lea, e mana’omia ai ona tatou usita’ia le faatonuga lenei a Iesu: “O so o se aai po o se nuu tou te ō atu i ai, ia sa’ili po o iai sē ua tatau i ai le fe’au.” (Mata. 10:11) E tatou te lē faatalitalia e talilelei mai i le tala lelei ē e lē lotofaamaoni, faamaualuluga, ma leai se naunau mo mea faaleagaga. Ae e tatou te sa’ilia ē e faamaoni, lotomaualalo, ma nau nau mo le upu moni. E tai pei lea vala o le galuega sa faia e Iesu a o avea ma kamuta,

3. O le ā e tatau ona tatou ua’i i ai i lenei taimi o loo totoe, ma e faapefea ona fesoasoani mai le Galuega 13:48 ina ia tatou faia faapea?

4. E faapefea ona tatou maua i latou “ua saunia o latou lotu mo le ola e faavavau”?

sa ia sa’ilia se laupapa e fetāui lelei mo le faia o se meafale, faitoto’a, amo, po o se isi mea sa mana’o e fai. Pe a ia mauaina le laupapa talafeagai, ona ia faaaogā loa lea o meafaigaluega ma ona tomāi, e fau ai lenā mea. O le mea fo’i lenā e tatau ona tatou faia, a o tatou taumafai e a’oa’o ē e lotofaamaoni ina ia avea ma soo.—Mata. 28:19, 20.

<sup>5</sup> E tofu lava le meafaigaluega ma lona fuafuaga. O se faaa’oa’oga, se’i mafaufau i meafaigaluega faakamuta na faaaogā e Iesu.\* Sa ia mana’omia meafaigaluega e fua ma maka ai laupapa; pe tipi, faapū, ma faia ia maua foliga o loo mana’o ai; ma faatutalaga, faasasa’o, ma faapipii faatasi ai laupapa. I se tulaga talitutusa, e iai fo’i fuafuaga faapitoa o meafaigaluega ta’itasi mo le a’oa’o atu. Se’i vaai la pe e faapefea ona tatou faaaogāina nei meafaigaluega tāua ua tatou mauaina.

## MEAFAIGALUEGA E FAAILOA ATU AI I TATOU

<sup>6</sup> **Pepa o Faamatalaga.** O nei pepa e lāiti ae o ni meafaigaluega aogā e faailoa atu ai i tatou i tagata, ma tata’i i latou i la tatou Upega tafa’ilagi, lea o le a latou a’oa’oina ai e faatatau iā i tatou, ma e mafai fo’i ona latou talosaga mo se su’esu’ega faale-Tusi Paia. Ua silia i le 400,000 talosaga mo su’esu’ega faale-Tusi Paia i la tatou Upega tafa’ilagi, ma le faitau selau o isi talosaga o loo maua i aso ta’itasi. O se mea lelei le iai o ni au pepa mo faamatalaga, ina ia mafai ai

\* Taga’i i le mataupu “O le Kamuta” ma le pusa “Pusa Faigaluega a le Kamuta” i *Le Olomatamata* o Aokuso 1, 2010.

5. O le ā e mana’omia ona tatou iloina e faatatau i a tatou Meafaigaluega mo le A’oa’o Atu? Aumai se faata’ita’iga. (Taga’i i ata i luga a’e o le matua.)

6, 7. (a) O ā ni auala na e faaaogāina ai pepa o faamatalaga? (e) O ā fuafuaga e lua o le valaaulia mo le sauniga?

ona e molimau atu a o faia au fuafuaga o le aso.

<sup>7</sup> **Valaaulia.** E lua fuafuaga o le pepa e masani ona ta'ua o le valaaulia mo le sauniga. O loo iai le faamatalaga: “E valaaulia oe e su'esu'e le Tusi Paia ma Molimau a Ieova,” ona tuu ai lea e filifili pe e fia su'esu'e “i a [tatou] sauniga mo le lautele,” pe e mana'o e asiasi atu “se tasi e fesoasoani” iā te ia. O lea, o lenei meafaigaluega e lē gata ua faailoa atu ai i tatou, ae ua valaaulia ai fo'i isi “o ē e naunau i mea faaleagaga,” ina ia tatou su'esu'eina faatasi le Tusi Paia. (Mata. 5:3) O le mea moni, e tatou te valaaulia tagata i a tatou sauniga e tusa pe e latou te talia se su'esu'ega faale-Tusi Paia pe leai. Pe a latou auai i a tatou sauniga, o le a latou vāai ma faalogo i le auala moni e a'o'a'oina ai le Tusi Paia.

<sup>8</sup> E tāua le silia i le faatasi ona valaaulia o tagata i a tatou sauniga. Aiseā? O le a mafai ai ona latou iloa le telē o le eseese o le tamaoiga faaleagaga o a tatou sauniga, ma le malapagā faaleagaga o loo iai Papelonía le Aai Tele. (Isa. 65:13) O le vala lenā na ta'ua e se tasi o ulugalii i le Iunaite Setete. Na filifili Ray ma Linda e amata ona o i se lotu. Sa la talitonu i le Atua ma manana'o e faamalie o la mana'oga faaleagaga, ma amata loa ona auai i lotu ta'itasi. E tele lotu eseese i lea aai, ae e lua vala na ua'i i ai le ulugalii a o auai i nei lotu. Muamua, e tataua ona la a'oa'oina se mea aogā pe a auai i se lotu. Lua, e tataua ona atagia mai i foliga o tagata lotu o i latou o tagata o le Atua. Ina ua mavae ni nai tausaga, sa la auai i lotu uma lava i le aai, ae e la te le'i maua le fiafia. E leai se mea na la a'oa'oina mai i lotu, ma e matuā lē lelei foliga vaaia o tagata lotu. Ina ua la tuua le lotu mulimuli sa iai i le la lisi, ona alu lea o Linda e faigaluega, ae alu Ray

8. Aiseā e tāua ai le silia i le faatasi ona auai tagata i a tatou sauniga? Aumai se faata'ita'iga.

i le fale. Sa tau atu Ray i se Maota mo Sauniga ma na ia mafaufau, 'Se'i o'u afe e vaai pe e ā mai lea lotu.' O le mea moni, o le tapua'iga sili lea ua ia auai ai. Sa māfana ma faaleuō tagata uma i le Maota mo Sauniga, ma na onomea o latou la'e. Sa nofo Ray i le pito i luma, ma na ia fiafia i mea na ia a'o'a'oina. Sa pei ona faalogona o le tagata na ta'ua e le aposetolo o Paulo na auai i se sauniga faa-Kerisiano mo le taimi muamua ma faapea mai: “E moni, ua iā te outou le Atua.” (1 Kori. 14:23-25) Ina ua mae'a lenā, ona amata lea ona auai Ray i sauniga i Aso Sa uma, ona sosoo lea ma sauniga amata o le vaiaso. Na amata fo'i ona auai Linda i sauniga, ma na la talia se su'esu'ega faale-Tusi Paia ma papatiso e ui ua silia i le ta'i 70 o la tausaga.

### MEFAIGALUEGA E AMATA AI TALANOAGA

<sup>9</sup> **Sāvai.** E valu a tatou sāvai ua faigofie ona amata ai talanoaga. Talu ona tatala nei sāvai i le 2013, ua pe ā ma le lima piliona kopi ua uma ona lolomiina. O le itu e lelei ai nei sāvai, o le taimi lava e te iloa ai faaogā se sāvai se tasi, ua e iloa fo'i faaogā isi sāvai uma ona e tutusa uma lava le auala e faatulaga ai. E faapefea ona e faaogā se sāvai e amata ai se talanoaga?

<sup>10</sup> Atonu e te filifili e faaogā le sāvai *O le ā le Malo o le Atua?* Ia faaali i le tagata le fesili o loo i luma ma fesili i ai: “Pe e iai se taimi na e taumānatu ai po o le ā le Malo o le Atua? Pe e te faapea mai o . . . ?,” ona tuu ai lea po o lē fea o tali e tolu e na te filifilia. Nai lo o le fai atu e sesē pe sa'o lana tali, ia su'e i le vaega “Manatu o le Tusi Paia,” ona talanoa lea i mau o loo iai, o le Tanielu 2:44 ma le Isaia 9:6. Pe a talafeagai, ia faaaau le

9, 10. (a) Aiseā e faigofie ai ona faaogā sāvai? (e) Faamatala le auala e faaogā ai le sāvai *O le ā le Malo o le Atua?*

talanoaga. O le vala mulimuli, ia faasino i le tagata le fesili o loo i le pito i tua i lalo o le ulutala “Ia Mafaufau i Ai”: “E faape’i le olaga o le a iai i le pulega a le Malo o le Atua?” O le faavae lenā mo le isi lua talanoaga. Pe a e toe fo’i e asi o ia, e mafai ona faasino i le lesonea e 7 o le polosiua *Tala Lelei Mai i le Atua!*, o se tasi lea o meafaigaluega e amata ai su’esu’ega faale-Tusi Paia.

### MEFAIGALUEGA E FAATUPU AI LE NAUNAU

**11 Mekasini.** O *Le Olomatamata* ma le *Ala Mai!*, o lomiga ia ua aupito i tele lona lomiana ma le faaliliuina i le lalolagi. Talu ai ua lauiloa nei lomiga i le tele o atunuu, ua fuafua ai la mataupu autū o nei mekasini ina ia tosina i ai tagata i so o se vaipanoa. E tatau ona tatou faaaogāina nei lomiga ina ia faatupu ai le naunau o tagata i mataupu e sili ona tāua i le olaga. Peita’i, ina ia tatou faaaogāina lelei nei meafaigaluega, e tatau ona tatou iloa po o ai na tusia faapitoa i ai nei lomiga.

**12 Ala Mai!** Ua saunia faapitoa lenei mekasini mo tagata faitau e itiiti pe e leai so latou malamalama i le Tusi Paia. Atonu e latou te lē iloa a’oa’oga faa-Kerisiano, lē toe faatua-tuaina lotu, pe e latou te lē iloa fo’i e tāua le Tusi Paia. O le fuafuaga autū o le *Ala Mai!*, o le faatalitonu lea o tagata o loo soifua le Atua. (Roma 1:20; Epe. 11:6) E fesoasoani fo’i i le tagata faitau e atia’e lona faatua-tua i le Tusi Paia “o le mea moni, o le afioga a le Atua.” (1 Tesa. 2:13) O mataupu autū nei mo lomiga o le 2018: “Le Ala e Maua ai le Fiafia,” “Auala e 12 e Taulau ai Aiga,” ma le “Fesoasoani mo Ē e Faavauvau.”

11. O le ā le fuafuaga o a tatou mekasini, ma o le ā e tatau ona tatou iloa e faatatau i nei mekasini?

12. (a) O ai ua saunia faapitoa i ai le *Ala Mai!*, ma o le ā lona fuafuaga? (e) O le ā se itu na e taulau talu ai nei i le faaaogāina o lea meafaigaluega?

**13 O Le Olomatamata** mo le lautele, e ua’i atu i mataupu faaleagaga mo i latou e faaaloalo i le Atua ma lana Afioaga. E ui atonu e iai so latou malamalama i le Tusi Paia, ae e latou te lē o maua le poto sa’o e faatatau i a’oa’oga o le Tusi Paia. (Roma 10:2; 1 Timo. 2:3, 4) O mataupu autū mo lomiga o le 2018, e taliina ai fesili nei: “Po o Aogā Pea le Tusi Paia?,” “O le a Faape’i le Lumanā’i?,” ma “Po o Manatu Mamafa Mai le Atua iā te Oe?”

### MEFAIGALUEGA E UUNA’IA AI

**14 Vitiō.** I aso o Iesu, e le’i faaaogāina ni meafaigaluega faakamuta e alu i le uila. E ese mai i aso nei ua iai meafaigaluega e alu i le uila, e pei o ‘ili, masini sanipepa, fana fao, ma le tele o isi meafaigaluega. I se tulaga talitutusa, e ese mai i lomiga ae ua iai fo’i ni vitiō matagofie se fā i a tatou Meafaigaluega mo le A’oa’o atu: *Aiseā e Su’esu’e ai le Tusi Paia?, O le ā e Faia i se Su’esu’ega Faale-Tusi Paia?, O ā Mea o Loo Faia i se Maota mo Sauniga?*, ma *Molimau a Ieova —O ai i Matou?* O vitiō e itiiti ifo ma le lua minute le uumi, e fetau lelei mo ulua’i asi-asiga. Ae o vitiō uumi e mafai ona faaaogā i toe asiga ma i latou e lē o pisi. O nei meafaigaluega matagofie, e mafai ona uuna’ia ai tagata e su’esu’e le Tusi Paia ma auai i a tatou sauniga.

**15** O se faaa’oa’oga, sa feiloa’i se tuafafine ma se fafine na siitia mai i Maikoronesia e tautala i le gagana Yapese, ma na ia faaali i le fafine le vitiō *Aiseā e Su’esu’e ai le Tusi Paia?* i lana gagana. Ina ua amata le vitiō, na

13. (a) O ai ua saunia faapitoa i ai *Le Olomatamata* mo le lautele? (e) O le ā se itu na e taulau talu ai nei i le faaaogāina o lea meafaigaluega?

14. (a) O le ā le fuafuaga o vitiō e fā mai i Meafaigaluega mo le A’oa’o Atua? (e) O le ā se itu na e taulau ai i le faaaogāina o nei vitiō?

15. Faamatala ni faaa’oa’oga o le aafiaga o le matamata o le tagata i se vitiō i lana lava gagana.

faapea mai le fafine: “Ou te lē talitonu o la’u gagana lea. Ou te faalogo atu i le tautala a le tama lea e sau i le vitiō, e sau mai i le matou motu.” Ina ua mǎe’a, na amata ona ia faitau ma matamata i mea uma e maua i lana gagana i le jw.org. (Faatusatusa i le Galuega 2: 8, 11.) O se isi faaa’oa’oga, na lafo e se tua-fafine i le Iunaite Setete i le atalii o lona tuagane, se *link* o lea vitiō i lana gagana. Ina ua uma ona ia matamata, na ia toe imeli i le tuafafine: “Na ou fialia i le vaega lea o loo ta’ua ai e iai le agaga o loo pulea le lalolagi. Ua uma ona ou talosaga mo se su’esu’ega faale-Tusi Paia.” E nofo lenei alii i se atunuu o loo faasāsā ai le galuega.

### MEAFALUEGA A’OA’O AI LE UPU MONI

**16 Polosiuā.** E faapefea ona a’oa’o atu le upu moni i se tagata e lē lelei le faitau, pe e leai ni lomiga faale-Tusi Paia i lana gagana? Ua iai la tatou meafaigaluega mo lenā vaega, o le polosiuā *E te Ola e Faavavau pe a E Faalogo i le Atua*.<sup>\*</sup> O se tasi o meafaigaluega lelei e amata ai su’esu’ega, o le *Tala Lelei Mai i le Atua!* E mafai ona e faali i le tagata lesona e 14 i le pito i tua o le polosiuā, ona tuu ai lea e na te filifilia se lesona e fialia i ai, ma amata ai se su’esu’ega i lenā lesona. Pe na e faata’ita’ia lenā auala i sau toe asiga? O le polosiuā lona tolu mai i a tatou Meafaigaluega mo le A’oa’o Atu, *O Ai o Loo Faia le Finagalo o leova i Aso Nei?* Na fuafua lenei polosiuā ina ia tata’i ai tagata su’esu’e i le faalapotopotoga. Ina ia iloa le auala e faaaogā ai lenei polosiuā i su’esu’ega, taga’i i le polokalame o Mati

<sup>\*</sup> Pe a lē iloa e le tagata faitau, e mafai ona faaaogā le polosiuā *la Faalogo i le Atua*, auā e tele ata o loo iai.

16. Faamatala le fuafuaga autū o polosiuā nei: (a) *E te Ola e Faavavau pe a E Faalogo i le Atua*. (e) *Tala Lelei Mai i le Atua!* (i) *O Ai o Loo Faia le Finagalo o leova i Aso Nei?*

2017 i *La Tatou Faiva ma le Olaga Faa-Kerisiano—Polokalame mo le Sauniga*.

**17 Tusi.** Pe a mǎe’a ona amata le su’esu’ega i se polosiuā, e mafai ona sui i so o se taimi le su’esu’ega i le tusi *O ā A’oa’oga Mai i le Tusi Paia?* O lenei meafaigaluega o le a faalautele ai le malamalama o le tagata i a’oa’oga faavae o le Tusi Paia. Pe a mǎe’a lenā tusi ma o loo aga’iga’i i luma faaleagaga le tagata su’esu’e, e mafai ona faaaauu le su’esu’ega i le tusi *Auala e Tumau ai i le Alofa o le Atua*. O lenei tusi o le a a’oa’o ina ai le tagata su’esu’e i auala e faatatau ai mataupu silisili o le Tusi Paia i aso ta’itasi. Ia manatua, e tusa po ua uma ona papatiso se tagata su’esu’e, e mana’omia ona faaaauu pea lana su’esu’ega se’ia mǎe’a nei tusi e lua. E feosoani lea ina ia mauaa ai o ia i le upu moni.—**Faitau le Kolose 2:6, 7.**

**18** I le avea ai o i tatou ma Molimau a leova, ua tuuina mai iā i tatou “le upu moni o le tala lelei,” lea e ta’ita’ia ai tagata i le ola e faavavau. (Kolo. 1:5; **faitau le 1 Timoteo 4:16.**) O lea, ua aumaia ai Meafaigaluega mo le A’oa’o Atu e tatou te mana’omia. (Taga’i i le pusa “Meafaigaluega mo le A’oa’o Atu.”) Tau ina ia tatou faaaogāina lelei nei meafaigaluega. E filifili lava e le tagata tala’i le lomiga e ofoina atu i se tagata fialia, ma le taimi e ofo ai. Peita’i, e lē tatau iā i tatou ona tau ina ofo atu lomiga, pe tuu fo’i i tagata e lē fialia mai i la tatou fe’au. Ae o lo tatou sini, ia faia ma soo i latou e faamaoni, lotomaulalo, ma naunau mo le upu moni, lea “ua saunia o latou loto mo le ola e faavavau.”—Gal. 13:48; Mata. 28:19, 20.

17. (a) O le ā le fuafuaga autū o tusi mo su’esu’ega? (e) O le ā e mana’omia ona fai e i latou o loo aga’iga’i i luma mo le papatisoga, ma aiseā?

18. (a) I le avea ai o i tatou ma ē e a’oa’o atu le upu moni, o le ā ua faalaeiuina i tatou i le 1 Timoteo 4: 16 e fai, ma o le ā le i’uga? (e) O le ā lo tatou sini e tatau ona iai a o faaaogāina a tatou Meafaigaluega mo le A’oa’o Atu?



# MEFAIGALUEGA MO LE A'OA'O ATU

## PEPA O FAAMATALAGA MA VALAAULIA



## MEKASINI



## SĀVALI



## VITIŌ



## POLOSUIA MA TUSI







# Na Matuā Faamanuia Ieova i La'u Faai'uga

FAAMATALAINA E CHARLES MOLOHAN

E tafa mai loa ata o le vaveao, ae uma loa ona tuu a matou sāvali i lalo o faitoto'a o fale o aiga i le oganuu na tofia ai i matou. I le 1939, na matou ō ese mai i o matou fale i le vaeluapō, ma aga'i atu i taavale i le silia i le itula i le tama'i aai o Joplin, i le itu i saute i sisifo o Missouri i Amerika. Ina ua uma le oganuu, na matou toe feosofi i taavale ma aga'i atu i le mea na tatau ona toe feiloa'i ai, e faatali le isi vaega o le 'autala'i. Atonu e te taumānatu pe aiseā na matou tala'i ai a o le'i oso a'e le lā, ma ō ese faatopetope mai i le oganuu. O le a ou faamatala atu le māfuaaga i se taimi mulimuli ane.

OU TE lotofaafetai i o'u mātua Kerisiano o Fred ma Edna Molohan, ona sa la totō i lo'u loto le tūa o le faamaoni i le Atua. Na ou fanau i le 1934 ina ua 20 tausaga talu ona avea i la'ua o ni Tagata A'oga o le Tusi Paia (po o Molimau a Ieova). Sa nonofo lo matou aiga i Parsons, o se tama'i aai i le itu i saute i sasa'e o Kansas. Sa matou auai i le faapopotoga i inā, lea e toetoe o ona sui uma o Kerisiano faauuina. Sa iai le faasologa lelei a lo matou aiga o le auai i sauniga, ma tala'i atu upu moni o le Afioga a le Atua. Na masani ona matou auai i tala'iga i ala tetele i aoauli o Aso Toona'i, o le ta'u lenā o tala'iga i nofoaga faitele i na aso. Sa ou lagona le vaivai i nisi o taimi, ae e masani ona faatau e lo'u tamā a matou aisakulimi pe a uma le tala'iga, ma o se mea e faafiafiaina ai i matou.

E la'itiiti la matou faapotopotoga, ae e telē la matou oganuu lea na aofia ai ni tama'i aai, faapea le tele o faato'aga i vaipanoa e latalata ane. A o

matou tala'i i le 'aufaifaato'aga, e masani ona tuu ai a matou lomiga ae aumai a latou fualaau faisua, fuāmoa, ma moa ola. O mea'ai na sa faaaogā e lo matou aiga, ona ua uma ona toto'i e lo'u tamā na lomiga.

## TAUIVIGA FAAPITOA

Na faatau mai e o'u mātua se laau e tā ai lauga e faaaogā i le galuega tala'i. E le'i mafai ona ou faaaogāina le laau ona ou te la'itiiti. Ae na ou fiafia e fesoasoani i o'u mātua a o la tāina lauga na pu'eina a le uso o Rutherford, i a la toe asiga ma su'esu'ega faale-Tusi Paia.

Na faaaogā e lo'u tamā la matou taavale (o le itu-aiga o le Ford 1936) e fai ma taavale faasalalau, e ala i le tuu o se sipika telē i le pito i luga o le taavale. Na telē le aogā o lenā taavale i le faalauiloaina o le fe'au o le Malo. E muamua ona tā se musika ina ia faaua'i mai ai tagata, ona tā lea o se



O i matou ma o'u mātua i luma  
o la matou taavale faasalalau



Sauni e pu'e se polokalame  
i le leitiō o le WBBR



E matou te tufatufaina pepa e  
faalauiloa ai le WBBR i le tala'iga

lauga faale-Tusi Paia ua uma ona pu'eina. Pe a uma ona tā le lauga, ona matou ofoina lea o lomiga i tagata fiafia.

I le tama'i taulaga o Cherryvale i Kansas, na faailoa atu e leoleo i lo'u tamā e faasā ona alu atu le taavale faasalalau i totonu o le paka, ona o loo mā-lōlō ai le to'atele o tagata i Aso Sa, ae e mafai ona ave i fafo o le paka. Na usita'i lo'u tamā i leoleo ma ave le taavale faasalalau i le auala e faafesaga'i ma le paka, lea na mafai ai ona faalogo tagata i le fe'au o le Malo, ma faauau ai le tāina o lauga. O se fiafiaga iā te a'u le tala'i faatasi ma lo'u tamā, faapea lo'u uso matua o Jerry.

Ina ua lata i le 1940, na matou auai i tauiviga faapitoa ina ia vave galuea'iina oganuu na to'atele ai tagata tetee. E matou te usupō (e pei ona matou faia i Joplin i Missouri) ma tuu lemū a matou sāvali po o tama'itusi i lalo o faitoto'a o aiga. Pe a uma, e matou te feiloa'i i fafo o le aai ina ia vaai pe na iai se tasi na taofia e leoleo.

O se isi vala mata'ina o la matou faiva i lenā taimi, o savaliga e faailoa atu ai le fe'au o le Malo. Ina ia faasalalau atu le tala lelei o le Malo, na faatautau pepa malō i o matou tau'au a o savavali i totonu o le aai. Ou te manatua se tasi o na savaliga i lo matou aai, na tauaveina ai e le 'autala'i ni pepa na tusia ai le fe'au *"Religion Is a Snare and a Racket"* (O Lotu o se Mailei ma o se Faiga Faapi'opi'o). E pe tusa ma le tasi le maila (1.6 km) le mamao o la latou savaliga i totonu o le aai, ona toe fo'i mai lea i lo matou fale. O le mea e faafetai ai e leai se isi na tetee, ae e to'atele tagata fiafia na vaavaai ane.

## O TAUAOFIAGA I TAIMI A O O'U LA'ITIITI

Sa masani ona faimalaga atu lo matou aiga mai i Kansas ina ia auai i tauaofiaga i Texas. Na faigaluga lo'u tamā i le kamupani nofoaafi na ta'ua o le Missouri-Kansas-Texas Railroad, o lea na mafai ai ona matou ti'eti'e fua i nofoaafi a o aga'i atu i tauaofiaga, ma asia ai fo'i o matou aiga. Na nonofo le tuagane matua o lo'u tinā o Fred Wismar ma lana avā o Eulalie, i le aai o Temple i Texas. Na a'oa'oina e Fred le upu moni a o talavou i le amataga o vaitausaga o le 1900, ma papatiso ai. Na ia faasoa atu fo'i i ona tuafāfine mea na ia a'oa'oina, e aofia ai ma lo'u tinā. Na lausilafia e le to'atele o uso i Texas ia Fred, ona sa galue ai i inā o se auauna o le sone (ua ta'ua nei o le ovasia o le matagaluga). O Fred o se tagata e agalelei ma fiafia. O se fiafiaga fo'i i isi le faifaimea faatasi ma ia. Na maelega o ia i le upu moni, ma o ia o se taa'iga lelei i lo'u olaga o se talavou.

I le 1941, na malaga atu ai lo matou aiga i se nofoaafi i St. Louis i Missouri e auai i se tauaofiaga tele. Na valaaulia talavou uma ina ia nonofo faatasi i se vaega faapitoa o le malae taalo na fai ai le tauaofiaga, e faalogo i le lauga a le uso o Rutherford na ta'ua *"Children of the King"* (O Fanau a le Tupu). Ina ua mae'a le lauga, na maua e tamaiti uma se meaalofo faapitoa o le tusi *Children*, lea na tufatufaina e le uso o Rutherford ma uso na fesoasoani iā te ia. E silia i le to'a 15,000 tamaiti na mauaina lenā faamanuiaga faaleagaga.

Na matou auai i le fonotaga la'itiiti ma tāua o le *"Call to Action"* (Valaaulia Ina ia Fai se Gaoioga) i

Coffeyville i Kansas iā Aperila i le 1943. O le taimi lenā na faasilasila ai o le a faia le A’oga o le Faiva Faatiokarate i faapotopotoga uma, ma tatala ai se tama’itusi e 52 lesone e faaogā i le a’oga. O le tausaga fo’i lenā na fai ai la’u lauga muamua i le a’oga. O se fonotaga faapitoa lenā mo a’u, ona na matou papatiso ai ma isi i se vai mālūlū, i se faato’aga na latalata ane.

## LO’U SINI E AUAI I LE PETELI

Na mǎe’a a’u a’oga i le 1951, ma sa tatau ona ou filifili po o le ā la’u galuega o le a fai i le lumana’i. Na ou fia auauna i le Peteli, lea na auauna ai fo’i Jerry i tausaga ua mavae. E le’i umi ae lafo loa la’u tusi talosaga i le ofisa i Brooklyn. Na matuā aogā lenā faai’uga i lo’u itu faaleagaga. E le’i leva ae talia loa la’u talosaga, ma valaaulia ai a’u e amata i le auunaga Peteli iā Mati 10, 1952.

Sa ou fia galue i le matagaluega e lolomi ai mekasini ma lomiga. Ae na tofia a’u e galue o se *waiter*, ma mulimuli ane galue i le umukuka. Na ou fiafia e a’oa’oina le tele o mea mai i na galuega. Ou te le’i maua lava le faaeaga e galue ai i le matagaluega e lolomi ai lomiga. Talu ai na fesuisuia’i taimi e galulue ai i le umukuka, na ou maua ai taimi paganoa i le aso e fai ai a’u lava su’esu’ega faale-Tusi Paia i le faletusi tele a le Peteli. O le faia faapea, na ou aga’iga’i ai i luma faaleagaga ma faamalosiā ai lo’u faatuatua. Na faamalosiā ai fo’i lo’u faaunauga e auauna iā Ieova i le Peteli, po o le ā lava le umi e mafai ai. Na tuua e Jerry le Peteli i le 1949 ae faipoipo atu iā Patricia, ma sa nonofo i Brooklyn e latalata i le Peteli. Na aveia i la’ua o se fesoasoani ma faalaeiauga tele iā te a’u, ina ua ou amata i le Peteli.

E le’i leva ona ou amata i le Peteli, ae faatulaga loa ni uso e faata’ita’i a latou lauga ina ia maua ai nisi uso e faia lauga i le lautele, e faaopoopo i le lisi o failauga a le Peteli. O uso na tusia o latou igoa i lenā lisi, na tofia e asiasi i faapotopotoga i totonu o le 200 maila (322 km) le mamao mai i Brooklyn ina ia faia lauga i le lautele, ma tala’i faatasi ma faapotopotoga. Na iai fo’i lo’u igoa i lenā lisi, ma na ou manatu i ai o se faeaga. Na ou lagona le fefe i le taimi na faia ai la’u lauga i le lautele muamua, lea

e tasi le itula le umi i na aso. E masani ona ou alu i nofoaafi e asiasi i faapotopotoga. Ou te manatua pea se aoauli mālūlū o se tasi Aso Sa i le 1954, a o o’u alu i se nofoaafi aga’i i Niu Ioka. Sa tatau ona ou taunuu i le Peteli i le afiafi, ae na faafuase’i ona agi mai matagi malolosi mālūlū, ma to’a ai le kiona. O le i’uga, na faalētonu ma pepē ai afi o le nofoaafi. Ae na toe ola le nofoaafi ma taunuu ai i le aai o Niu Ioka, i le pe tusa o le tā o le lima i le vaveao o le Aso Gafua. Na ou toe pu’eina le isi nofoaafi e aga’i atu i Brooklyn, ma ou alu sa’o loa i le umukuka e faigaluega. Na ou tuai i le galuega ma lagona le vaivai ona o le nofo i le pō atoa i le nofoaafi. Peita’i, na galo uma na mea iā te a’u ona o le fiafia e galulue faatasi ma uso i nei asiasiga faapitoa, ma feiloa’i ai ma le to’atele o uō fou.

E le’i leva ona ou amata i le Peteli, ae valaaulia loa a’u e faia so’u sao i polokalame i le leitiō o le WBBR, lea na iai i le fogāfale lona lua o le Peteli i le 124 Columbia Heights. O lo’u tofiga o le auai lea i se polokalame e su’esu’e ai le Tusi Paia, na faasalalauina i vaiaso ta’itasi. Na auai e lē aunoa le uso o A. H. Macmillan i na polokalame i le leitiō, ma ua leva ona ia auauna i le Peteli. Sa matou valaauina o ia o le uso o Mac, ma o ia o se faa’oa’oga mata’ina o le tumau i le auunaga iā Ieova mo i matou talavou i le aiga Peteli.

Na tofia a’u i le 1958 ou te fesoasoani i le A’oga o Kiliata. O la’u galuega na aofia ai le fesoasoani i ē na faauu mai i le a’oga ina ia maua o latou visa, ma fuafua faigāmalaga mo nei tane ma fafine malelega. Na matuā taugatā le malaga i vaalele i na taimi, o lea e lē to’atele ē na faauu na mafai ona ō i vaalele. O le to’atele o ē na tofia e galulue i Aferika ma le Atua Asia, na faimalaga i vaa la’u oloa. Ina ua taugofie le faimalaga i vaalele i tausaga mulimuli ane, sa to’atele misionare na ō i vaalele i atunuu na tofia ai i latou.

## FAIMALAGA ATU I TAUAOFIAGA

Na tofia fo’i a’u i le 1960 e faatulaga ni faigāmalaga faapitoa i vaalele, mai i Amerika e aga’i i Europa mo tauaofiaga faavaomalo o le 1961. Na ou alu i se tasi o na faigāmalaga faapitoa mai i Niu



O i matou ma Patricia ma Jerry Molohan a o aga'i atu i le tauaofiaga "Peace on Earth" i le 1969



Faamaopoopo tusipasi o le A'oga o Kiliata a o le'i faia se faauuga

Ioka e aga'i i Hamburg i Siamani, ina ia auai i lenā tauaofiaga. Ina ua mǎe'a le tauaofiaga, na totogi la matou taavale ma isi uso e to'atolu mai i le Peteli. Na matou ō i le taavale mai i Siamani e aga'i i Italia, ina ia asia le ofisa o le lālā i Roma. Na matou ō fo'i i Falani ma ui atu i atumauga o Pyrenees, ma aga'i atu i Sepania lea na faasā ai le galuega tala'i. Na mafai ona matou ō ma ave ni nai lomiga i uso i Barcelona, lea na afi'i pepa faapitoa ina ia foliga atu o ni meaalofa. O se fialiaga iā i matou le feiloa'i ma na uso. Na matou aga'i i Amsterdam, ma pu'e ai le vaalele e toe fo'i i Niu Ioka.

E pe tusa ma se tausaga mulimuli ane, ae tofia fo'i a'u e faatulaga ni faigāmalaga mo sui na filifilia e malaga atu i tauaofiaga faavaomalo faapitoa, na faia i vaega eseese o le lalolagi. O le fonotaga lenā o le 1963 na ta'ua o le "Everlasting Good News" (Tala Lelei e Faavavau). Na faia fuafuaga mo sui usufono e to'a 583 ina ia malaga faataamilo i le lalolagi e auai i tauaofiaga i Europa, Asia, le Pasefika i Saute, ae faai'u i Honolulu i Hawaii, ma Pasadena i Kalifonia. Na faia fo'i fuafuaga ina ia asiasi atu i Lapanona ma Jordan, mo ni maimoaga faapitoa i laueleele o le Tusi Paia. E lē gata na faatulaga e la matou matagaluega i le Peteli faigāmalaga faapitoa i vaalele ma faletalimālō e api ai sui usufono, ae na fesoasoani fo'i i le faia o visa e mana'omia mo atunuu eseese.

### SE PAGA FOU E MA TE FAIMALAGA FAATASI

E iai se isi mǎfuaaga na matuā tāua ai iā te a'u le tausaga e 1963, ona na ou faaiipoipo ai iā Lila Rogers mai i Missouri iā Iuni 29. Ua tolu tausaga

talua ona auaua Lila i le Peteli. I le vaiaso na sosoo ai ina ua uma ona ma faaiipoipo, na ma auai ai i le faigāmalaga e faataamilo i le lalolagi ma asiasi atu i Eleni, Aikupito, ma Lapanona. Na ma pu'eina se vaalele mai i Beirut e aga'i atu i se tama'i malaevaalele i Ierusalem, ma o se faigāmalaga puupuu. Na iai faasāsāaga o la tatou galuega i inā, ma na faailoa mai e uso e lē o mafai ona maua ni visa o Molimau a Ieova e ulu atu ai i le atunuu. O lea, na ma taumānatu ai po o le ā se mea o le a tupu pe a ma taunuu i Ierusalem. Ae na matuā faafiafiaina i ma'ua ina ua taunuu i le malaevaalele. Na ma vaaia ai le to'atele o uso o loo tutū i le malaevaalele, ma o loo latou uuina se faailoilo o loo tusia ai le faaupuga "Welcome Jehovah's Witnesses" (Afifio Mai Molimau a Ieova). Ma'e'u se fialiaga o le vāaitino i laueleele o le Tusi Paia! Na ma asiasi atu i vaipanoa na nonofo ai augātāmā anamua, nofoaga na tala'i ai Iesu ma le 'auaposetolo, faapea le nofoaga na amata ai ona salalau atu le faa-Kerisiano i tulu'iga uma o le lalolagi.—Gal. 13:47.

Ua atoa nei le 55 tausaga talua ona avea Lila ma a'u paga faamaoni i o ma tofiga uma i le auauaga. Na ma asiasi atu i Sepania ma Potukali i le tele o taimi a o faasā le galuega tala'i. Na mafai ona ma faalaeiau atu i uso, ma avatu lomiga ma isi mea na latou mana'omia. Na ma asiasi atu fo'i i nisi o uso i le falepuipui i se nofoaga sa faamautū ai vaega'au i Cádiz i Sepania. Na matuā olioli lo'u loto i le mafai ona ou faamalosiā iā i latou, e ala i se lauga faale-Tusi Paia.

Talu mai le 1963, o se faaeaga iā te a'u le feso-

soani e faatulaga ni faigāmalaga i tauaofiaga faavaomalo i Ausetalia, Aferika, Amerika i Saute, Amerika Tutotonu, Europa, le Atu Asia, Niu Sila, Puerto Rico, ma Hawaii. Na ma olioli faatasi ma Lila i le tele o tauaofiaga mata'ina, e aofia ai le tauaofiaga i Warsaw i Polani i le 1989. E to'atele uso mai i Rusia na latou auai i lenā tauaofiaga tele, ma o le taimi muamua lenā ua latou auai ai i se tauaofiaga. Na matou feiloa'i ai ma nisi o uso ma tuafāfine na faafalepuipui e le faigāmalo o Rusia mo le tele o tausaga, ona o lo latou faatuatua.

O se faaeaga tele iā te a'u le asiasi i ofisa o lālā i le lalolagi aoao, ina ia faamalosiau i aiga Peteli ma misionare. I la ma asiasiga mulimuli i Korea i Saute, na matou feiloa'i ai ma uso e to'a 50 i le falepuipui i Suwon. Na faaaauu ona fiafia na uso ma latou tulimata'ia le taimi e toe auai ai i le faiva. Na matuā faalaeiauina i ma'ua i le feiloa'i ma i latou. —Roma 1:11, 12.

### OLIOLI I LE VAAIA O LE FAATELEGA

Ua ou molimauina le faamanuia a Ieova i ona tagata, e ala i le faatupula'ia o lo latou faitau aofa'i. Ina ua ou papatiso i le 1943, e pe tusa ma le 100,000 tagata tala'i sa iai. Ae i le taimi lenei, ua silia i le 8,000,000 auauna a Ieova i atunuu e 240. O se tasi o māfuaaga tāua o lenā faatelega, ona o le tau lamua o misionare na faauu mai i Kiliata i le galuega tala'i. Ma'eu se fiafiaga o le galulue soosootau'au ma le to'atele o nei misionare, ma fesoasoani iā i latou ina ia taunuu i o latou tofiga i atunuu ese!

Ou te lotofaafetai i la'u faai'uga na fai a o o'u talavou, ina ia faalautele la'u faiva e ala i le talosaga mo le auaunaga Peteli. Na matuā faamanuia Ieova iā te a'u i le tele o tausaga. E lē gata e ma te olioli ma Lila i le auaunaga Peteli, ae e tele fo'i tausaga na matou galulue faatasi ai ma faapotopotoga i Brooklyn i le galuega tala'i, ma maua ai le tele o uō moni.

O loo faaaauu pea ona ou auauna i le Peteli, faatasi ai ma le fesoasoani a Lila i aso ta'itasi. E ui lava ua silia i le 84 o'u tausaga, ae o loo o'u maua pea le fiafia i le faia o galuega lelei, e pei o le fesoasoani i le tusiaina o tusi e lafo i lālā.

O se fiafiaga tele iā te a'u le iai i totonu o le faalapotopotoga mata'ina a Ieova, ma mātāu le telē o le eseese o le e auauna iā Ieova, ma lē e lē auauna iā te ia. Ua tatou malamalama lelei i le uiga o le Malaki 3:18: “O le a outou toe iloa ai lava le eseese o le tagata amiotonu ma le tagata amioleaga, o le eseese fo'i o le o loo auauna i le Atua ma lē e lē o auauna iā te ia.” A o faagasolo aso ta'itasi, e tatou te vaaia le faateteleina o le tulaga leaga o le faiga o mea a Satani, lea e tumu i tagata e leai se faamoemoe ma faanoanoa. Peita'i, e fiafia ē e alolofa ma auauna iā Ieova e ui o loo ola i nei aso e sili ona faigatā, ma e iai lo latou faamoemoe pupula. Ma'eu se faaeaga ua tatou maua e folafola atu le tala lelei o le Malo! (Mata. 24:14) O loo tatou tulimata'ia le taimi o le a faaumatia ai e le Malo o le Atua lenei lalolagi tuai, ma aumaia le lalolagi fou faatasi ai ma le anoanoa'i o faamanuiaga, e aofia ai le soifua mālōlōina lelei atoatoa, ma le ola e faavavau. Ua toe o se aga ona tatou 'ae'ae lea i na faamanuiaga. O le taimi lenā o le a maua ai e auauna faamaoni a Ieova le ola e faavavau i le lalolagi fou.



O i ma'ua ma Lila i le taimi lenei



## Ia Maufaatutuaina Keriso lo Tatou Ta'ita'i

*“E to'atasi lo outou Ta'ita'i o le Keriso lea.”—MATA. 23:10.*

PESE: 16, 14

### PE E TE MANATUA?

O le ā le ta'ita'iga maufaatutuaina na saunia mo tagata o le Atua i aso o Iosua?

O le ā e tatou te a'oa'oina mai i le auala na ta'ita'ia ai e Keriso le faapotopotoga i le ulua'i senituri?

O ā māfuaaga e tatou te maufaatutuaina ai le ta'ita'iga a Keriso i aso nei?

NA MANATUA pea e Iosua le fetalaiga a Ieova e faapea: “Ua maliu la'u auauna o Mose; o lea ia e tula'i ma sopo'ia atu lenei vaitafe o Ioritana, o oe ma lenei nuu uma, i le laueleele ou te foa'iina atu ia i latou.” (Iosua 1:1, 2) Na vave ona suia le tulaga o mea mo Iosua, o lē na avea ma auauna a Mose mo le toetoe 40 tausaga.

<sup>2</sup> Talu ai ua leva ona avea Mose ma ta'ita'i o Isaraelu, na ono taumānatu la Iosua po o le a faape'i le tali mai a tagata o le Atua i lana ta'ita'iga. (Teu. 34:8, 10-12) Ua ta'ua i se lomifefiloi faale-Tusi Paia e faatatau i le Iosua 1:1, 2 e faapea: “I aso anamua ma aso nei, pe a sui le ta'ita'i o se atunuu, o se tasi lea o taimi e sili ona faigatā mo le saogalemu o ona tagatānuu.”

<sup>3</sup> E lē taumatea na lagona e Iosua le fefe, ae ina ua mavae ni nai aso, na ia faia loa se gaoioiga. (Iosua 1:9-11) E le'i sesē le maufaatutuaina e Iosua o le Atua. E pei ona ta'ua i le Tusi Paia, na ta'ita'ia e Ieova Iosua ma Lona nuu o Isaraelu, e ala i se agelu. Ua tala-

1, 2. O ā lu'i na feagai ma Iosua ina ua maliu Mose?

3, 4. E faapefea ona tatou iloa e le'i sesē le maufaatutuaina e Iosua o le Atua, ma o le ā e tatou te ono fesili ifo ai iā i tatou lava?

feagai ona faapea atu, o lenā agelu o le Upu, o le Alo ulumatua o le Atua.—Eso. 23:20-23; Ioa. 1:1.

<sup>4</sup> O le fesoasoani a Ieova na faigofie ai i tagata Isaraelu ona lagolagoina le suia o lo latou ta'ita'i iā Iosua, ina ua maliu Mose. Ua tatou ola fo'i i taimi o suiga iloga, ma atonu e tatou te taumānatu, 'A o faatelevave pea le aga'iga'i i luma o le faalapotopotoga a le Atua, pe e iai ni māfuaaga e tatau ona tatou maufaatuatuaina ai Iesu lo tatou Ta'ita'i ua tofia?' (**Faitau le Mataio 23:10.**) Se'i mātua le auala na saunia ai e Ieova le ta'ita'iga maufaatuatuaina i aso ua mavae a o faia suiga.

### TAITA'IA LE NUU O LE ATUA I KANANA

<sup>5</sup> E le'i leva talu ona sopo'ia e le nuu o Isaraelu le vaitafe o Ioritana, ae tupu loa se mea e le'i faatalitalia. Na feiloa'i Iosua ma se tagata o loo uu se pelu i lona lima, i se nofoaga e lata i Ieriko. E le'i iloa e Iosua po o ai lea tagata. O lea na ia fesili atu ai: "Pe e te 'au ma i matou po o matou fili?" Na faate'ia Iosua i le faailoa mai e lea tagata toa, o ia "o le perenise [po o le ta'ita'i] o le 'autau a Ieova," ma ua nofosauni o ia e puipuia tagata o le Atua. (**Faitau le Iosua 5:13-15.**) E ui lava o loo faaalii i isi mau o loo fetalai tuusa'o mai Ieova iā Iosua, ae e lē taumateā sa fetalai mai Ieova e ala mai i se agelu, e pei ona masani ai i taimi ua te'a.—Eso. 3:2-4; Iosua 4:1, 15; 5:2, 9; Galu. 7:38; Kala. 3:19.

<sup>6</sup> E manino faatonuga na tuuina mai e lenā agelu iā Iosua, i le auala e faato'ilalo ai le aai o Ieriko. Na ono foliga mai i le taimi mua-mua e lē atamai nisi o na faatonuga. O se

5. O ai na feiloa'i ma Iosua ina ua lata i Ieriko? (Taga'i i le ata i luga a'e o le matua.)

6-8. (a) Aiseā na foliga atu ai e leai se aogā o nisi o faatonuga a Ieova i le vaaiaga a tagata? (e) Na faapefea ona iloa le atamai ma le talafeagai o le taimi na aumaia ai na faatonuga? (Taga'i fo'i i le faaopoopoga i le pito i lalo.)

faaa'oa'oga, na faatonuina e Ieova ina ia peritomeina tane uma, o se gaoioiga o le a lē mafai ai ona latou tau mo ni nai aso. Po o le taimi talafeagai lea e peritomeina ai nei tane malolosi?—Kene. 34:24, 25; Iosua 5:2, 8.

<sup>7</sup> Atonu na mafaufau nei fitafita Isaraelu, po o le a faapefea ona puipuia o latou aiga pe a osofa'ia e nei fili malolosi lo latou togā-lauapi. Peita'i, na faafuase'i ona suia le tulaga o mea. Na maua tala "ua matuā puipuia le aai o Ieriko ona o le fanauga a Isaraelu, e leai se tasi na toe alu i fafo po o se tasi fo'i na sau i totonu." (Iosua 6:1) Pe e le'i faamallosia ai lo latou faatuatuaina o faatonuga a le Atua, ona o le suia faafuase'i o le tulaga o mea?

<sup>8</sup> Na faatonuina fo'i tagata Isaraelu e aua le faato'ilaloina Ieriko, ae ia faatasi ona savavali faataamilo i le aai mo aso e ono. Ae pe a oo i le aso lona fitu, ona faafitu lea ona savavali faataamilo i le aai. Na ono manatu nisi o fitafita, 'Ua ma'imau lo matou taimi ma le malosi.' Peita'i, na silafia lelei e Ieova le Ta'ita'i o Isaraelu le gaoioiga na ia faia. O le mulimuli o tagata Isaraelu i ana faatonuga, e lē gata na faamallosia ai lo latou faatuatua, ae e le'i mana'omia ai fo'i ona latou tau ma tagata totoa o Ieriko.—Iosua 6:2-5; Epe. 11:30.\*

<sup>9</sup> O le ā e tatou te a'oa'oina mai i lenā tala? E ono iai taimi e tatou te lē malamalama atoatoa ai i māfuaaga e faia ai e le faalapotopotoga a Ieova ni fuafuaga fou. O se faata'ita'iga, atonu na tatou mafaufau i le

---

\* Na maua e tagata e su'esu'eina toega o mea i le elele le tele o faaputuga saito mai i toega o le aai o Ieriko. Ua faaalii ai e le'i umi se taimi na vagaia ai le aai. Na faatonuina tagata Isaraelu e aua ne'i o latou aveesea ni mea'ai mai i le aai o Ieriko. O lea, e fetauti lo latou faato'ilaloina o le aai ma le vaitaimi o le seleselaga lea na anoanoa'i ai mea'ai na maua i le lauelele.—Iosua 5:10-12.

9. Aiseā e tatau ai ona tatou mulimuli i faatonuga mai i le faalapotopotoga a le Atua? Aumai se faata'ita'iga.

taimi muamua pe e iai se aogā o le faaaogā o masini faaonapōnei mo su'esu'ega a le tagata lava ia, i le faiva, ma sauniga. Ae o lea ua tatou iloa nei aogā o le faaaogā o nei masini pe a mafai. O le vaaiā o i'uga lelei o na suiga e ui e tatou te le'i mautinoa ai i le taimi muamua, ua faamalosia ai lo tatou faatuatua ma le autasi.

### TA'ITA'IGA A KERISO I LE ULUA'I SENITURI

<sup>10</sup> E pe ā ma le 13 tausaga talu ona liliu Konelio e avea ma Kerisiano, ae na tausisi pea nisi o Kerisiano Iutaia i le peritomeina. (Gal. 15:1, 2) Ina ua fevaevae'i uso i Anetioka, na faia loa se fuafuaga ina ia ave e Paulo lea mataupu i le vaega pule i Ierusalem. Ae o ai na aumaia lenā faatonuga? Na ta'ua e Paulo: "Na ou alu a'e ona o se faaliga mai i le lagi." E manino mai, na faatonutonuina e Keriso le tulaga o mea ina ia mafai ai e le vaega pule ona fo'ia lenā finauga.—Kala. 2:1-3.

10. O ai na faatonutonuina le fono tāua sa faia e le vaega pule i Ierusalem?

<sup>11</sup> E ala i le ta'ita'iga a Keriso, na faailoa manino atu ai e le vaega pule e lē mana'omia ona peritomeina Kerisiano e lē o ni Iutaia. (Gal. 15:19, 20) Ae ina ua mavae ni nai tausaga, na faaaauu pea ona peritomeina e le to'atele o Kerisiano Iutaia a latou fanau. Ina ua faalogo toeaina i Ierusalem i le talafeavea'i e faapea, e lē o tausisia e Paulo le Tulafono a Mose, na latou avatu ai iā te ia ni faatonuga e na te le'i faatalitalia.\* (Gal. 21:20-26) Na latou faatonuina o ia ina ia ave ni tamālooa se to'afā i le malumalu ina ia faamamāina i latou, ma iloa ai e tagata na 'tausisia e Paulo le Tulafono.' Na ono fesiligia e Paulo le atamai o lenā faatonuga, ma finau atu o le pogai o le faafitauli o Kerisiano Iutaia e le'i malamalama i le mataupu o le peritome. Nai lo o lea, na ia lagolagoina ma

\* Taga'i i le pusa "Na Talia ma le Lotomaulalo e Paulo se Tofotofoga" i *Le Olomatamata*, o Mati 15, 2003, itu. 24.

11. (a) O le ā le manatu sa iai pea i nisi o Kerisiano Iutaia e faatatau i le peritomeina? (e) Na faapefea ona tofotofoina le lotomaulalo o Paulo e lagolagoina le faatonuga a toeaina i Ierusalem? (Taga'i fo'i i le faapoopoga i le pito i lalo.)

Na iai faamaoniga o le ta'ita'iga a Keriso i le ulua'i senituri  
(Taga'i i le palakalafa e 10, 11)





le lotomaulalo le faai'uga a toeaina lea e faa-  
auluma ai le autasi o uso talitonu. Ae e  
tatou te ono tuufesili, 'Aiseā e le'i vave ai  
ona taulima e Iesu lenei mataupu, ae ua faa-  
lēaogāina e lona maliu le Tulafono a Mose?'  
—Kolo. 2:13, 14.

<sup>12</sup> E iai i latou e mana'omia se taimi ina ia  
fetuutuuna'i ai pe a iai se suiga i le malama-  
lamaga. Na mana'omia e Kerisiano Iutaia se  
taimi e toe fetuuna'i ai o latou manatu. (Ioa.  
16:12) Na faigatā i nisi ona talia le manatu,  
e lē o toe avea le peritomeina ma faailoga o  
se faiā faapitoa ma le Atua. (Kene. 17:9-12)  
Ae o le fefefe o nisi ne'i sauāina i latou, na  
latou faatalatū ai e matilatila ese mai i ta-  
gata Iutaia. (Kala. 6:12) Peita'i, a o faaga-  
solo taimi na saunia mai ai e Keriso isi faato-  
nuga atili, e ala mai i tusi a Paulo.—Roma 2:  
28, 29; Kala. 3:23-25.

### TA'ITA'IA PEA E KERISO LANA FAAPOTOPOTOGA

<sup>13</sup> Pe afai e tatou te lē malamalama atoa-  
toa i māfuaaga ua faia ai nisi o suiga i le faa-  
lapotopotoga, e ao ona tatou manatunatu i  
le auala na ta'ita'ia ai e Keriso tagata o le  
Atua i aso ua mavae. E tusa po o taimi o  
Iosua po o le ulua'i senituri, ae na faaaauu  
pea ona saunia e Keriso faatonuga atamai  
ina ia puipuia ai tagata o le Atua, faamalo-  
sia lo latou faatuatua, ma faatumauina ai lo  
latou autasi.—Epe. 13:8.

<sup>14</sup> O faatonuga ua aumai i le taimi tatau e  
ala mai i “le pologa faamaoni ma le faauta-  
uta,” ua atagia mai ai le manatu mamafa o  
Iesu i lo tatou itu faaleagaga. (Mata. 24:45)  
Ua faapea mai Marc o se tamā e to'afā lana

12. O ā māfuaaga atonu e le'i vave ai ona taulima  
e Keriso le mataupu e faatatau i le peritomeina?

13. O le ā e mafai ona fesoasoani iā i tatou e tali-  
sapaia ai le ta'ita'iga a Keriso i aso nei?

14-16. Ua faapefea ona atagia mai le manatu ma-  
mafa o Keriso i lo tatou itu faaleagaga, e ala i faa-  
tonuga mai i “le pologa faamaoni ma le faauta-  
uta”?

fanau: “O loo taumafai Satani e faavaivaia  
faapotopotoga e ala i le osofa'ia o aiga. Ae  
o faalaeiauga ina ia faia pea tapua'iga a le  
aiga i vaiaso ta'itasi, ua faamamafa mai ai i  
ulu o aiga le fe'au lenei: ia puipuilu o  
latou aiga.”

<sup>15</sup> Pe a tatou malamalama i le auala o loo  
ta'ita'ia ai i tatou e Keriso, e tatou te iloa fo'i  
lona naunauta'iga ina ia tatou aga'iga'i pea  
i luma faaleagaga. Ua faapea mai Patrick o  
loo auauna o se toeaina: “I le taimi mua-  
mua, na lagona e nisi le lotovaivai e feiloa'i  
i ni vaega to'alaiti mo tala'iga i faai'uga o vai-  
aso. Ae o lenei faatulagaga ua faaalua ai se  
tasi o uiga autū o Iesu, o lona naunau moni  
lea i tagata faatauvaa. Ua lagona e uso ma  
tuafāfine e matamumuli pe seāseā tala'i, le  
matuā talisapaia ma le tāua o i latou. O le  
i'uga, ua latou tuputupu a'e ai faaleagaga.”

<sup>16</sup> E lē gata e tausia e Keriso o tatou ma-  
na'oga faaleagaga, ae e fesoasoani mai fo'i  
ina ia tatou taula'i atu pea i le galuega e sili  
ona tāua o loo faia i le lalolagi i aso nei.  
**(Faitau le Mareko 13:10.)** E taumafai lava  
André o se toeaina fou, e mulimuli i so o se  
faatonuga fou e aumaia e le faalapotopo-  
toga a le Atua. Ua faapea mai o ia: “O le faa-  
itiitia o i latou e galulue i ofisa o lālā, ua faa-  
manatu mai ai le faanatinati o le taimi ua iai,  
ma e mana'omia ona faaogā lo tatou ma-  
losi i le galuega tala'i.”

### LAGOLAGO MA LE FAAMAONI LE TA'ITA'IGA A KERISO

<sup>17</sup> O le ta'ita'iga o loo tatou maua mai iā  
Iesu Keriso lo tatou Tupu tofia, o le a fe-  
soasoani iā i tatou i le taimi lenei ma le  
lumana'i. O lea, ia tatou taula'i i aogā ua  
maua mai i le fetuutuuna'i i ni suiga na faia  
talua ai nei. Atonu o se mea lelei le tala-  
noaina i la outou tapua'iga a le aiga, o

17, 18. Aiseā e tāua ai le taula'i atu i aogā ua  
maua mai i le fetuutuuna'i i ni suiga na faia talua ai  
nei?

auala ua aogā ai iā te outou suiga ua faia i sauniga i vaiaso ta'itasi po o le faiva.

<sup>18</sup> Pe a tatou malamalama i le māfuaaga ua aumaia ai e le faalapopotoga a Ieova ni faatonuga faapea o latou aogā, e mautinoa o le a tatou fiafia fo'i e mulimuli i na faatonuga. E tatou te lotofaafetai i le tele o tupe ua sefe ona o le faaitiitia o lomiga ua lomaiaina, ma le faaaogā o masini faaonapōnei. O le i'uga, ua mafai ai ona faalatele atu le galuega o le Malo i le lalolagi aoao. O le manatuaina o lenā mea, o le a tatou faaaogā ai lomiga, ata, ma vitiō i luga o masini faaonapōnei i le tele e mafai ai. O se tasi lea o auala e tatou te lagolagoina ai Keriso, i le faaaogā tatau lea o foa'i tautupe a le faalapopotoga.

<sup>19</sup> Pe a tatou lagolagoina ma le faamaoni le ta'ita'iga a Keriso, e tatou te faamalosia ai le faatuatua o isi ma saosaolaumea i lo tatou autasi. O le faamatalaga lenei a André e tusa ai ma le faaitiitia o aiga Peteli i le lalolagi aoao: “O uiga lelei na faaalua e i latou sa galulue muamua i le Peteli e tusa ai ma lenā suiga, na atili faamalosia ai lo'u faatuatua

19. Aiseā e tatau ai ona tatou lagolagoina le ta'ita'iga a Keriso?

ma lo'u faaaloalo iā i latou. E latou te piama atu pea i le kariota a Ieova, e ala i le olioli i so o se tofiga e tuuina atu iā i latou.”

### IA MAUFAATUATUAINA LO TATOU TA'ITA'I

<sup>20</sup> E lē o toe umi ona “manumalo a'ia'i” lea o lo tatou Ta'ita'i tofia o Iesu Keriso, ma ia faataunuaina “mea mata'utia.” (Faaa. 6:2; Sala. 45:4) Ae mo le taimi lenei, o loo ia sauniunia tagata o le Atua mo le lalolagi fou, lea o le a faia ai so tatou sao i le a'oa'oina o i latou o le a toetutū mai, faapea le toe faafo'isia o le lalolagi ina ia avea ma parataiso.

<sup>21</sup> O le a ta'ita'iina atu i tatou i le lalolagi fou e lo tatou Tupu faauuina, pe afai e faauau ona tatou matuā maufaatuatuaaina o ia e ui i suiga i o tatou tulaga. **(Faitau le Salamo 46:1-3.)** E iai taimi e faigatā ai ona tatou talia ni suiga, aemaise pe afai o ni suiga e le'i faatalitalia. E faapefea la ona tatou maua pea le filemu o le mafaufau ma matuā maufaatuatuaaina Ieova? O le a taliina lenā fesili i le mataupu o loo sosoo mai.

20, 21. (a) Aiseā e mafai ai ona tatou maufaatuatuaaina lo tatou Ta'ita'i o Keriso? (e) O le ā le fesili o le a taliina i le mataupu o loo sosoo mai?

---

Po o e fesoasoani i lou aiga ma isi ina ia piama atu pea i le faalapopotoga a Ieova?  
(Taga'i i le palakalafa e 17, 18)





# Ia Faatumauina le Filemu o le Mafaufau pe a Suia o Tatou Tulaga

*“Ua ou faato’afimālie ma faafilemu lo’u loto.”—SALA. 131:2.*

INA ua tofia Lloyd ma Alexandra e fo’i i le fanua, na la lagona le faanoanoa i le taimi muamua. Ua silia ma le 25 tausaga talu ona la auuana i le Peteli. Ua faapea mai Lloyd: “Na ou vaai i le auuana i le Peteli ma la’u galuega sa faia ai, o lo’u faasinomaga lea. Na talia i lo’u mafaufau māfuaaga na faia ai lea suiga, ae i vaiaso ma masina na sosoo ai, na tele ina ou lagona le leai o se aogā. Na fesuisuia’i o’u faalogona. O isi taimi ou te fiafia, ae o isi taimi ou te faanoanoa.”

<sup>2</sup> Pe a suia faafuase’i o tatou tulaga, e tatou te ono lagona ai le lē mautonu ma le popole. (Faata. 12:25) Atonu e faigatā fo’i mo i tatou ona talia na suiga. Pe a tupu lenā mea, e faapefea ona tatou “faato’afimālie ma faafilemu” o tatou loto? (**Faitau le Salamo 131:1-3.**) Se’i o tatou iloiloaina nisi o auuana a Ieova i taimi o le Tusi Paia ma aso nei, o ē na faatumauina le filemu o o

1, 2. (a) E faapefea ona aafia se Kerisiano pe a suia faafuase’i lona tulaga? (Taga’i i le ata i luga a’e o le matua.) (e) E tusa ai ma le Salamo 131, o ā uiga e mafai ona faatumauina ai le filemu o le mafaufau?

PESE: 128, 129

## PE E TE MANATUA?

E faapefea “i le filemu mai i le Atua” ona fesoasoani iā i tatou pe a suia o tatou tulaga?

E faapefea ona tatou faa-’oa’o iā losefa pe a suia faafuase’i o tatou tulaga?

O le ā le lesona tāua e tatou te a’oa’oina mai i le faievage-  
lia o Filipo?

latou mafaufau e ui i suiga i o latou tulaga.

### MAUA “LE FILEMU MAI I LE ATUA”

<sup>3</sup> E pe tusa ma le 17 tausaga o Iosefa ina ua faatau atu o ia e ona uso e fai ma pologa, ona o lo latou lotoleaga iā te ia. A o le’i tupu lenā mea, na avea Iosefa ma pele a lona tamā. (Kene. 37:2-4, 23-28) E pe ā ma le 13 tausaga na faapologa ma faafalepuipuiina ai Iosefa i Aikupito, lea e mamao ese mai i le mea sa iai lona tamā pele o Iakopo. O le ā na fesoasoani iā Iosefa ina ia ‘alofia ai faalagona ita ma le leai o se faamoemoe?

<sup>4</sup> A o iai Iosefa i le falepuipui, e lē taumatea na taula’i atu o ia i faamaoniga o le faamanuia a Ieova. (Kene. 39:21; Sala. 105:17-19) Atonu na ia mafaufau fo’i i ana miti faavaloga sa fai a o talavou, ma mautinoa ai o loo ia maua le finagalo malie o Ieova. (Kene. 37:5-11) Atonu na masani fo’i ona faailoa atu ona mafatiaga iā Ieova. (Sala. 145:18) Na tali mai Ieova i tatalo faatauanau a Iosefa, e ala i le faamautinoa mai o le a Ia ‘faatasi ma Iosefa’ i ona puapuaga uma.—Gal. 7:9, 10.\*

<sup>5</sup> E ui i tulaga faigatā, ae e mafai ona faato’afilemu i tatou “i le filemu mai i le Atua” lea e leoleoina ai o tatou mafaufau. (**Faitau le Filipi 4:6, 7.**) O lea, pe a tatou sa’ili atu iā Ieova i taimi e lofitūina ai i popolega, e mafai e le filemu mai i le Atua ona faamalosiā pea i tatou e ausia sini faaleagaga, ma lē

\* Ina ua mavae sina taimi talu ona faasa’oloto Iosefa mai i le falepuipui, na ia faailoa mai na faamāfanafanaina o ia e Ieova, e ala i le foa’i mai o se atalii mo ia. Na ia faaigoa lana ulumatua o Manase, talu ai na ia faapea ane: “O le Atua ua māfua ai ona galo iā te a’u o’u mafatiaga.”—Kene. 41:51, fpl.

3. O le ā le mea na tupu iā Iosefa?

4. (a) O le ā na taula’i atu i ai Iosefa a o iai i le falepuipui? (e) O le ā le auala na tali mai ai Ieova i tatalo a Iosefa?

5. O le ā le aafiaga o “le filemu mai i le Atua” i lo tatou faanaunauga e ausia sini faaleagaga?

faavaivai ai. Se’i o tatou tilofa’ia la nisi o faa’oa’oga i aso nei o i latou sa faia faapea.

### IA SA’ILI ATU IĀ IEOVA INA IA TOE MAUA AI LE FILEMU O LE MAFAUFAU

<sup>6</sup> Ina ua faailoa iā Ryan ma Juliette ua mae’a lo la tofiga na auauna ai o ni paeonia faapito mo se taimi lē tumau, na la lagona le lotovaivai. Ua faapea mai Ryan, “O le taimi lava lenā na ma tatalo ai iā Ieova. Na ma iloa o le avanoa lelei lea e faaalua ai lo ma mafauatuatua o ia. O le to’atele o la matou faapotopotoga e fou i le upu moni. O lea sa ma talosaga atu ai iā Ieova, ina ia fesoasoani mai iā i ma’ua e faataatia se faaa’oa’oga lelei o le faaalua o le faatuatua.”

<sup>7</sup> Na faapefea ona tali mai Ieova i la’ua tatalo? Ua ta’ua e Ryan: “O le taimi lava na uma ai la ma tatalo, na mou atu ai o ma faalagona faanoanoa ma popolega sa iai. Na leoleoina o ma loto ma mafaufau e le filemu mai i le Atua. Na ma iloa e mafai ona faaaogā pea i ma’ua e Ieova, pe afai e iai pea iā i ma’ua se vaaiga sa’o.”

<sup>8</sup> E lē gata e faato’afilemu e le agaga o le Atua o tatou mafaufau, ae e fesoasoani fo’i ina ia tatou taula’i atu ai i ni mau o le Tusi Paia, lea e mafai ai ona tatou faamuamua pea mea faaleagaga. (**Faitau le Ioane 14:26, 27.**) O se faaa’oa’oga, o Philip ma Mary o se ulugalii na auauna i le Peteli mo le toetoe 25 tausaga. I totonu o le fā masina, na maliliu uma ai o la tinā ma se tasi o o la tauaiga. Na amata loa ona la tausia le tamā o Mary, ona ua galogalo mea iā te ia.

<sup>9</sup> Ua faamatala e Philip: “Sa ou manatu sa lelei le auala na ou taulimaina ai mea, ae na

6, 7. E faapefea i le faama’oti o a tatou tatalo ona fesoasoani iā i tatou e toe maua ai le filemu o le mafaufau? Aumai se faaa’oa’oga.

8-10. (a) E faapefea ona fesoasoani mai le agaga o le Atua pe a tatou lagona le popole? (e) O ā auala e ono tali mai ai Ieova i a tatou taumafaiga ina ia faatumauna pea se vaaiga faaleagaga?

ia i se mea na misi. Na ou faitau i se mataupu i *Le Olomatamata* ma ou tau ai i le Kolose 1: 11. E moni sa ou tumau, ae e le'i atoatoa. Sa mana'omia ona ou 'tumau atoatoa **ma ia faapalepale, atoa ma le olioli.**' Na faamanatu mai i lenei mau, e lē faalagolago lo'u olioli i lo'u tulaga, ae e faalagolago i le galue o le agaga o le Atua i lo'u olaga.”

<sup>10</sup> Talu ai na iai pea iā Philip ma Mary se vaaiga faaleagaga i lo la tulaga, na faamanuia Ieova i a la taumafaiga i le tele o auala. E le'i umi talu ona la ō ese mai i le Peteli, ae iai ni a la su'esu'ega faale-Tusi Paia e aga'iga'i i luma faaleagaga, ma e manana'o e sili atu i le faatasi ona faia a latou su'esu'ega i le vaiaso. Ua faapea mai Mary: “Na ma olioli ona o i latou, ma o le auala lea na faailoa mai ai e Ieova e aua ma te popole i se mea.”

### TUU ATU IĀ IEOVA SE MEA E NA TE FAAMANUIA I AI

<sup>11</sup> Pe a suia faafuase'i o tatou tulaga, atonu o le a tatou soona popole ai ma tau-la'i atu ai i o tatou popolega. Na ono mafai ona tupu lenei mea iā Iosefa. Peita'i, na ia filifili e faia le mea sili na te mafaia, ma o lea na ia tuu atu ai iā Ieova se mea e na te faamanuia i ai. E ui lava sa iai o ia i le falepuipui, ae na galue malosi Iosefa e faia so o se galuega na tuuina atu e le leoleo sili, e pei ona ia faia a o auauna ai iā Potifara.—Kene. 39:21-23.

<sup>12</sup> I se tasi aso, na tofia ai Iosefa e vaavaaia ni tamālooa se to'alua sa iai ni tulaga maualuluga i le maota o Farao. O le agalelei o Iosefa iā i la'ua, na mafai ai ona la faailoa mai iā te ia o la popolega ma a la miti e faigatā ona faamatala sa faia i le pō na muamua atu. (Kene. 40:5-8) Na lilo i manatu o Iosefa


11, 12. (a) Na faapefea ona tuuina atu e Iosefa iā Ieova se mea e na te faamanuia i ai? (e) Na faapefea ona tauia Iosefa ona o lona tumau?

o le a iai se i'uga lelei o lenā talanoaga. E ui lava na iai pea o ia i le falepuipui mo le isi lua tausaga, ae na i'u ina faasa'olotoina o ia ma tofia ai i le aso lava lenā, e avea ma pule e lona lua iā Farao.—Kene. 41:1, 14-16, 39-41.

<sup>13</sup> E pei o Iosefa, atonu e iai taimi e tatou te feagai ai ma se tulaga e lē mafai ona tatou suia. Peita'i, pe a tatou onosa'i pea ma faia taumafaiga uma ina ia faia le mea sili e tusa ma o tatou tulaga, o lenā ua tatou tuuina atu iā Ieova se mea e na te faamanuia i ai. (Sala. 37:5) E moni e iai taimi e tatou te “fememea'i” ai, ae e lē faapea ai ua matuā leai so tatou faamoemoe pe “matuā fememea'i,” e pei ona ta'ua e le aposetolo o Paulo. (2 Kori. 4:8) O le a tatou tofo i le moni o upu a Paulo, pe afai e tatou te tau-la'i atu pea i la tatou faiva.

13. E faapefea ona tatou tuuina atu iā Ieova se mea e na te faamanuia i ai, e tusa lava po o ā o tatou tulaga?

E faapefea ona tatou faaa'oa'o iā Iosefa e tusa lava po o ā o tatou tulaga?  
(Taga'i i palakalafa e 11-13)



## IA TAULA'I ATU PEA I LAU FAIVA

<sup>14</sup> O se tasi o faaa'oa'oga lelei o sē sa taula'i atu pea i lana faiva e ui i suiga i lona tulaga, o le faievagelia o Filipo. Na matuā sauāina Kerisiano i Ierusalemā ina ua uma ona fasiotia Setefano.\* O le taimi lea o loo olioli Filipo i se faaeaga fou i le auunaga. (Gal. 6:1-6) Ae ina ua faataapeapeina soo o Keriso, e le'i faapea na nofonofo ai Filipo ma lē faia se gaioiga. Na alu atu o ia ma tala'i i Samaria, o se aai o le tele o ona vaipanoa e le'i oo i ai le tala lelei.—Mata. 10:5; Gal. 8:1, 5.

<sup>15</sup> Na lotomalie Filipo e alu i so o se mea e ta'ita'iina i ai o ia e le agaga o le Atua. O lea na faaaogā ai o ia e Ieova e tala'i atu i oganuu fou. Na faalaeiauina tagata Samaria i ona uiga lē faailoga tagata, talu ai sa masani ona manatu faatauvaa tagata Iutaia iā i latou. E lētioa la ua'i atu iā te ia le motu o tagata ma le "lotogatasi."—Gal. 8:6-8.

<sup>16</sup> Na sosoo ai ma le ta'ita'iina atu o Filipo e le agaga o le Atua i Asetota ma Kaisareia, o ni aai sa to'atele ai tagata o Nuu Ese. (Gal. 8:39, 40) Ua pe ā nei ma le 20 tau-

\* Taga'i i le mataupu "E te Silafia?" i lenei lomiga.

14-16. Na faapefea ona taula'i atu pea le faievagelia o Filipo i lana faiva, e ui i suiga i lona tulaga?

saga talu mai le taimi muamua na tala'i ai Filipo i Samaria, ma ua toe suia fo'i lona tulaga. O lea ua avea nei o ia o se tamā e tausi aiga, ma na faamautū i le oganuu lea sa tala'i ai. E ui lava na suia lona tulaga, ae na taula'i atu pea Filipo i lana faiva. O le i'uga, na matuā faamanuiaina o ia ma lona aiga e Ieova.—Gal. 21:8, 9.

<sup>17</sup> Ua ta'utino mai le to'atele o auuuna faataimi atoa, o le taula'i atu pea i la latou faiva ua mafai ai ona faatumauiina pea se vaaiga sa'o, e ui i suiga i o latou tulaga. Ina ua ō ese mai i le Peteli Osborne ma Polite o se ulugalii mai i Aferika i Saute, na la manatu o le a vave ona maua ni a la galuega faavaitaimi ma se fale e nonofo ai. Ua faapea mai Osborne: "E le'i vave ona maua ni a ma galuega e pei ona ma faatalitalia." Ua ta'ua e lana avā o Polite: "E tolu masina o tau sa'ili ni ma galuega, ma e le'i iai fo'i se ma teugātupe. Na matuā faigatā lenā mea mo i ma'ua."

<sup>18</sup> O le ā na fesoasoani iā i la'ua e feagai ai ma lenā tulaga faigatā? Ua faapea mai Osborne: "O le tala'i faatasi ma le faapopotoga na matuā fesoasoani iā i ma'ua e tau-

17, 18. O ā aogā o le taula'i atu pea i le faiva pe a suia o tatou tulaga?



la’i atu ai pea i la ma faiva, ma iai pea se va-aiga sa’o. Na ma filifili ina ia pisi pea i le galuega tala’i nai lo o le nofonofo ma popole, ma na ma maua ai le tele o le olioli. Na faaaauu ona su’e ni ma galuega, ma na i’u lava ina maua.”

### IA FAATALITALI MA LE ONOSA’I IĀ IEOVA

19 E pei ona faaalua i faaa’oa’oga sa talanoaina i lenei mataupu, pe a tatou faia le mea sili e tusa ai ma o tatou tulaga ma faatalitali ma le onosa’i iā Ieova, o le a faatumauina ai le filemu o o tatou mafaufau. **(Faitau le Mika 7:7.)** Atonu o le a tatou iloa ai fo’i le tele o aogā faaleagaga o le faamasani i ni suiga fou. Pe a toe mafaufau i mea na tutupu i lona olaga, ua faapea mai Polite: “O le tofia o i ma’ua i le fanua ua ou a’oa’oina ai le uiga moni o le faalagolago iā Ieova, e tusa lava po o ā tulaga faigatā. Ua matuā faamalosia ai la ma faiā ma Ieova.”

20 O loo faaaauu pea ona tausia e Mary lea na ta’ua muamua lona tamā matua ma fai lana paeonia. Ua ta’utino mai o ia: “Pe a ou

19-21. (a) O le ā e fesoasoani iā i tatou ina ia faatumauina ai le filemu o o tatou mafaufau? (e) O ā ni aogā e tatou te maua mai i le faamasani i ni suiga fou?

popole i se mea, ua ou iloa le tāua o le mafaufau muamua, tatalo, ma taumafai e aua le soona popole. O le lesone e sili ona tāua ua ou a’oa’oina ma o le a matuā aogā a o faagasolo taimi, o le tuu atu lea o o’u popolega iā Ieova.”

21 Ua ta’utino mai Lloyd ma Alexandra lea na ta’ua i le amataga, o le suiga i o la tulaga na tofotofoina ai lo la faatuatua i auala e la te le’i faatalitalia. Ae na la toe faapea mai: “O tofotofoga o le faatuatua e iloa ai pe e moni lo tatou faatuatua, ma pe e mafai ona faamalosia ma faamāfanafanaina ai i tatou i taimi faigatā. O le i’uga, o le a avea ai i tatou ma tagata e sili ona lelei.”

22 Pe a suia faafuase’i lou tulaga ona o se suiga i tofiga, faalētonu le soifua mālōlōina, po o ni tiute tauave fou i le aiga, ia e mautinoa e manatu mamafa mai Ieova ma o le a ia fesoasoani mai i le taimi e tatau ai. (Epe. 4:16; 1 Pete. 5:6, 7) I le taimi e tasi, ia taumafai e faia le mea sili e tusa ai ma lou tulaga. Ia faalatalata atu i lou Tamā i le lagi e ala i le tatalo, ma tuu atu ou popolega iā te ia. O le faia faapea, o le a faatumauina ai le filemu o lou mafaufau e tusa pe e suia lou tulaga.

22. O le ā e tatou te mautinoa i ai pe a tatou taumafai e faia le mea sili e tusa ai ma o tatou tulaga?



O suiga e le’i faatalitalia e mafai ona i’u atu i faamanuiaga e le’i faatalitalia  
(Taga’i i palakalafa e 19-21)

## Na faapefea ona maua e le soo o Setefano le to'afilemu ina ua feagai ma sauāga?

NA FEAGAI Setefano ma se vaega o tagata teteē. O nei tamāloola o le Faamasinoga Sili lea i Isaraelu e faia a'e i faamasino e to'a 71, ma e telē le malosi-aga sa iai iā i latou. Sa faapotopoto i latou e le Osi-aulaga Sili o Kaiafa, lea fo'i na ta'imua i le faamasinoga na faia i nai masina muamua atu, lea na faasalaina ai Iesu i le oti. (Mata. 26:57, 59; Galu. 6: 8-12) A o latou aumaia molimau pepelo, e iai se mea mata'ina na latou mātauina iā Setefano, na to'afilemu ona foliga e pei "o fofoga o se agelu." —Galu. 6:13-15.

Na faapefea ona maua e Setefano le to'afilemu a o feagai ma lenā tulaga faigatā? A o le'i aveina faamalosi o ia i le Faamasinoga Sili, sa maelega o ia i lana faiva lea sa ta'ita'ia e le agaga o le Atua. (Galu. 6:3-7) Ina ua faamasinoina o ia, sa fesoasoani fo'i le agaga lava lea e faamāfanafana o ia ma faamanatu mea iā te ia. (Ioa. 14:16) O loo faamauina i le Galuega mataupu e 7, a o tali atu ma le lototele Setefano, na faamanatu atu e le agaga paia iā te ia le pe ā ma le 20 mau mai i Tususiga Paia Eperu. (Ioa. 14:26) Peita'i, na atili ona faamalosi le faatuatua o Setefano ina ua ia vaaia i se faaliga o loo tū Iesu i le itu taumatau o le Atua.—Galu. 7:54-56, 59, 60.

Atonu e iai le aso o le a tatou feagai ai ma faamata'uga ma sauāga. (Ioa. 15:20) Peita'i, o le a galue le agaga paia o leova iā i tatou pe a faitau e lē aunoa i le Afioga a le Atua, ma maelega i le faiva. O le a tatou maua fo'i le malosi e onosaia ai te-teega, ma maua ai pea le filemu o le loto ma le ma-faufau.—1 Pete. 4:12-14.

